



Republika e Kosovës
Republika Kosovo / Republic of Kosovo
Kuvendi i Komunës Rahovec
Opština Skupština Rahovac/Municipality of Rahovec




PROCESVERBAL

Nga mbledhja e rregullt e kuvendit komunal të Rahovecit, e mbajtur më **23.09.2022.** me fillim në ora **10:00.** Mbledhjen e kryesoi: Kryesuesi i kuvendit **z. Defrim Kafexhiu.** Konstatoj se kuorum për mbajtjen e mbledhjes kemi:

Kryesuesi – Fillimisht më lejoni të ju përshëndes, i nderuar kryetar i komunës **z. Smajl Latifi,** nënkryetar i komunës **z. Fatmir Iska,** të nderuar kuvendarë, drejtorë të drejtorive komunale, të nderuar qytetarë të komunës së Rahovecit, kjo është seanca e nëntë për këtë vit kalendarik. Komiteti për politikë dhe financa ka përgatitur gjithsej 8 pika;

Për këtë mbledhje sot propozojmë këtë:

REND DITE



1. Shqyrtimi dhe miratimi i procesverbalit nga mbledhja e kaluar;
2. Pyetjet dhe përgjigjet në pyetjet e kuvendarëve;
3. Informatë nga DKRS-ja për muajin e mërgimtarëve prej 15 korrik deri më 15 gusht 2022;
4. Shqyrtimi dhe miratimi i vendimit për planin komunal për menaxhimin e mbeturinave 2022 – 2026;
5. Shqyrtimi dhe miratimi i vendimit për miratimin e buxhetit për vitin 2023;
6. Shqyrtimi dhe miratimi i vendimit për programin komunal tre vjeçar për banim 2022 – 2024;
7. Shqyrtimi dhe miratimi i vendimit për shpalljen me interes të përgjithshëm P- 71510033-01041-1 në zonën kadastrale Xërxë;
8. Shqyrtimi dhe miratimi i vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës;

Pikë shtesë

1. Shqyrtimi dhe miratimi i vendimit për lirim nga taksa komunale për personat fizik dhe juridik për vlerësimin e dëmeve në bujqësi nga komisioni përkatës

Kryesuesi – Ky është rendi i ditës për sot, ndonjë propozim ose koment tjetër?...

Kryetari – I nderuar kryesues i kuvendit të komunës z.Defrim Kafexhiu, anëtarë të kuvendit, nënkryetar, drejtorë të drejtorive, përfaqësues të shoqërisë civile. Meqenëse me datë 17-18 shtator jemi ballafaquar me vërshime dhe përmbajtje, ky kuvend i komunës në vitin 2020 ka miratuar një rregullore për taksa, tarifa, gjoba, dhe ngarkesa, tani jemi në një situatë ku ministria e bujqësisë pylltarisë dhe zhvillimit rural e obligon secilin fermer ose bujk të dëmtuar të paraqesë kërkesë për vlerësimin e dëmeve, kjo kërkesë ka një kosto financiare prej 10 eurove. Sot, i propozoj kuvendi të komunës që të gjithë të dëmtuarit t'i lirojmë nga kjo taksë, mos t'i paguajnë 10euro, pavarësisht që ne kemi nevojë për të hyra por tani në këtë fazë kjo nuk na nderon. Kërkoj nga ju miratim të propozim vendimit për lirim nga taksat komunale për personat fizik dhe juridik për vlerësimin e dëmeve në bujqësi nga komisioni prej datës 19 shtator 2022 deri më 14 tetor 2022. Jemi në pozitë të papërshtatshme tani meqë janë të dëmtuar tua marrim edhe 10euro. Fatkeqësisht kjo vlenë vetëm për dëmet në bujqësi sepse rregullorja nuk parasheh për dëme në ekonomi familjare dhe amvisri.

Kryesuesi – Faleminderit kryetar. Atëherë po e vendosim në votim meqenëse është një vendim që iu lehtëson punën dhe kërkesat bujqëve që në këto ditë kanë hasur në vështirësi natyrore. Si pikë të dytë të rendit të ditës, menjëherë pas procesverbalit. Kush është për?... Me shumicë unanime si pikë e dytë e rendit të ditës vendoset;

Shqyrtimi dhe miratimi i vendimit për lirimin nga taksa komunale për persona fizik dhe juridik për vlerësimin e dëmeve në bujqësi nga komisioni përkatës.

Vazhdojmë me miratimin e rendit të ditës, kush është për?... Me shumicë votash aprovet edhe rendi ti ditës me gjithsej 9 pika për sot. Vazhdojmë me pikën e parë të rendit të ditës;

1.Shqyrtimi dhe miratimi i procesverbalit nga mbledhja e kaluar;

Dikush prej anëtarëve rreth procesverbalit?... Atëherë po e vendosim në votim, kush është për?... Me shumicë unanime miratohet edhe procesverbali i mbledhjes së kaluar.

2. Shqyrtimi dhe miratimi i vendimit për lirimin nga taksa komunale për personat fizik dhe juridik për vlerësimin e dëmeve në bujqësi nga komisioni komunal;

Lirigzon Kastrati – Faleminderit kryesues. I nderuar kryetar, drejtorë të drejtorive, zyrtarë monitorues. Meqenëse rregullorja nuk e parasheh që të lirohen edhe ekonomitë familjare, propozimi ynë është që edhe kjo kategori të përfshihet, është e paraparë me rregullore që jo dhe një gjë e tillë nuk mund të ndodh. Përndryshe në emër të grupit të asambleistëve e përkrahim këtë vendim.

Kryetari – Me të drejtë Lirigzoni e parashtroj pyetjen, por ministria e bujqësisë neve na imponon këtë rrethanë, për amvisri, ekonomi familjare, biznese dhe infrastrukturë nuk ka ngarkesë, komisionet e kryejnë punën dhe të dëmtuarit nuk kanë nevojë të paguajnë asgjë.

Kryesuesi – Faleminderit kryetar, dikush tjetër?... Nëse jo, atëherë po e vendosim në votim, kush është për miratimin e këtij vendimi, kundër?... abstenim?... Me shumicë votash aprovet vendimi për lirimin nga taksat komunale për personat fizik dhe juridik për vlerësimin e dëmeve në bujqësi nga komisioni komunal.

3. Pyetjet dhe përgjigjet në pyetjet e kuvendarëve;

Arber Zenuni – I nderuar kryetar i komunës së Rahovecit Smajl Latifi, nënkryetar Fatmir Iska, i nderuar kryesues i kuvendit z. Kafexhiu, të nderuar drejtorë të drejtorive dhe ju anëtarë të kuvendit. Më lejoni së pari të shpreh shqetësimin tim lidhur me situatën e fundit në komunën e Rahovecit, atë të përmbajtjeve nga reshjet e shiut, ku me çrast kemi të prekura shumë familje të cilat me mobilizimin e kryetarit dhe stafit të tij presin përkrahje dhe ndihmën duke evidentuar dëmet. Lidhur me këtë gjendje, kërkesa ime është që në Krushë të Madhe tani e disa vite kemi probleme nga reshjet e shiut, duke e ditur këtë gjë duhet të bëhen intervenimi në kolektorin e ujërave të zeza i cili nga pjesa e drinit e deri në hyrje të fshatit e deri në qendër është F-400, këtu duhet të bëhet një intervenim për shkak të mospërballimit të reshjeve atmosferike dhe pasojat barten ndërvite. Me një rregullim të gypit primar të segmentit kryesor të kanalizimit do të evidentohen shumë probleme dhe dëmet gjatë përmbajtjeve të mundshme do të ishin shumë më të vogla. Kërkesa e dytë ka të bëjë me objektet e qerdheve të cilat janë në fazë të përfundimit në lokacionet në Krushë të Madhe, Xërxe dhe Ratkoc, pyetja i drejtohet drejtorisë së arsimit, a do të hapen këtë vit, apo kur do të bëhet hapja e tyre?...

Burim Krasniqi – I nderuar kryesues i kuvendit, kryetar komune, nënkryetar, drejtorë, kolegë dhe gjithë ju prezent monitorues të seancës. Arbri e ngriti një shqetësim por për shkak që partia e tij është në pushtet ishte më i kursyer në deklaratimet e tij. Është fakt që fatkeqësitë natyrore janë fenomene që ndodhin në gjithë botën, nuk mund të ndalen as prej një kryetari të komunës, as prej ekzekutivit e as prej një qeverie. Fakt i dytë është që kemi situata të përsëritura në disa lokalitete, nëse nuk jam gabim është hera e 12-të që Fortesën e merr uji, është e 4-ta herë që shkollën e Sopniqit e merr uji bashkë me shtëpitë përreth. Rregullimi i një pjese të kanaleve në Celinë ka bërë që t'i ndihmojë më shumë që t'i merr uji ato fusha para rrugës Prizren-Gjakovë. Mendoj që nuk është zgjidhje që këto fenomene të përsëriten pas çdo reshje të shiut dhe krytari i komunës të del me çizme, të thonë ja kryetari sa burr i mirë po del me çizme t'i shoh dëmet që i ka bërë uji. Kryetar, i ke disa kontrata të rregullimit të shtretërve, në fund të fundit ndërpreji punimet dhe ktheji aty ku ka nevojë, trajtoji drejtë, zgjidhe problemin. Shkolla e Sopniqit është kërkesë ndërvite me shtëpitë përreth, sa herë që ka të reshura është fenomen që ka vërshim. Nuk është problemi i rregullimit të përrockës prej Fortesës në drejtim të Rahovecit, problemin është te ura te hekurudha në Xërxe e në vazhdim te poshtë, kush të ka këshilluar nuk e di, por të ka këshilluar gabim (mrapsht'). Nuk rregullohet përrockat prej burimit kah derdhja, por prej derdhjes te burimi, jo burimit t'ia rrisim shpejtësinë e prurjes së ujit sepse nuk mund t'a përballoj pjesa tjetër dhe të ketë vërshime non-stop. E di që nuk mund t'a ndalosh shiun, e di që këto të reshurat e fundit kanë qenë specifike, por është fakt që dihet botërisht që problemi i vërshimeve në Fortesë, Krushë, Sopniq dhe në fushat e Celinës është problem i përvitshëm, bile vitin e parë që e keni rregulluar përrockën në Celinë, në vërshimin e parë komplet betoni është dëmtuar dhe pjesa dërmuese e asaj përrocke. Të sugjeroj si asambleist, si Burim, si njeri që njihemi; orientoi drejtë investimet në raport me rregullimin e përrockave sepse sa herë do të ketë të reshura do të përsëritet e njëjta situatë. Po, ndoshta është një fushatë e mirë për të dalur me çizme duke thënë; po më vie keq që ju ka marr uji. Faleminderit shumë.

Fahrije Lushi – I nderuar kryesues, kryetar, këshilltarë dhe të gjithë të pranishmit. Meqë u përmendën disa lokalitete që janë vërshuar nga reshjet e fundit. Unë do të flas në emër të banorëve të fshatit Ratkoc, ku edhe në Ratkoc ka pasur vërshime jashtëzakonisht të mëdha. Kësaj here qytetarët nuk kërkojnë nga ju e as nga qeveria mbështetje të njëjtë si herave të kaluara, kësaj here kërkohet rregullimi i kanaleve të kullimit të ujërave. Këtu një pjesë të përgjegjësive e ka edhe drejtori i drejtorisë së shërbimeve publike sepse gjithmonë i kemi pasur kërkesat e njëjta dhe përgjigjet e njëjta. Kësaj here le të jetë si shenjë vetëdijesimi edhe nga ana juaj që intervenimet ose investimet të jenë me kualitet të lartë dhe që nuk duhet të përsëriten brenda vitit ose çdo vit rresht.

Kryetari - Faleminderit shumë, unë e kam një raport të regjistrimit të dëmeve në bujqësi, në amvisri, ekonomi familjare, biznese si dhe një raport preliminar të regjistrimit dhe vlerësimit të dëmeve në infrastrukturë publike. Unë nuk jam prej atyre që bëjnë reklama, por nëse ka investuar ndokush në këtë komunë në kanale të kullimit dhe shtretër të përrrenjëve, kam filluar me mandatin e parë, me të dytin dhe po vazhdoj me të tretin. Besoj që kuvendi i komunës është në dijeni për vlerat e kontratave dhe prioritizimin e këtyre projekteve që kanë të bëjnë me përballimin sa më të lehtë të këtyre situatave. Një shembull; shkolla fillore "Liria" në Fortesë, nuk e ka marrur uji gjatë vërshimeve, ndërsa qendrën e mjekësisë familjare po. Pra është një dryshim radikal të kujdesit se si duhet investohet dhe meqenëse qendra e mjekësisë familjare është ndërtuar pasluftës dhe meqenëse është në pikën më të ulët dhe vazhdimisht është përfshir nga vërshimet, kur e kemi bërë objektin e ri e kemi ngritur për evitimin e kësaj dukurie. Me qëllim të mirë dëshiroj t'a bëj një krahasim; në çoftëse në Ratkoc shtrati i përroit nga ura te poshtë e deri përtej hekurudhës është përfshirë nga uji të gjithë aty me familje, të gjithë i kam miqë e shokë, të gjithë janë uzupatorë. I bie që edhe Ratkoci që e ka shtratin e rregulluar nën hekurudhë e deri te shpijat e fundit, përsëri janë përmbytur nga uji. Fytat e ngushtë nën hekurudhën janë një nga problemet që e ngadalësojnë procesin e rrjedhjes së ujërave të rrëmbyeshme. Po e marr shembull Ratkocin, Fahrije; Biçeci që zakonisht ka bërë probleme, kësaj radhe jo, ndërsa 300metra më larg ka pasur vërshime edhe mbi urën e hekurudhës. Unë jam i gatshëm bashkë me juve të menaxhojmë dhe t'a shikojmë mundësinë se çka mundemi të bëjmë në këto situata. Për intervenim ka edhe pronarë privat që nuk lejojnë hapjen e kanalit, në Malësi të vogël te Lutajt. A janë ndërtuar projektet sipas standardeve?... Ne mund të kemi vërejtjet tona në arkitekt, në inxhinier, këshilltar joadekuat, por qëllimi jonë ka qenë të minimizohet deri në skajshmëri me kapacitetet tona buxhetore. Mbi

5 milion euro mund të jetë kostoja e trajtimit të shtretërve; Sopniq-Fortesë, Celinë, shtratin brenda Krushës së Madhe, këtu kemi ngecje në kontratë dhe besoj e dini pse kemi ngecje. Fatbardhësisht prej shtratit të Hoçës së Madhe nuk ka patur goditje si herave tjera. Te Sopniqi; mos të kishte ndodhur pastrimi që e kemi bërë në vitin 2021, sot komplet fshati do të ishte në ujë sepse e di çka ka ndodhur përpara aty dhe e di kësaj here cila pjesë është përfshirë nga vërshimet. Tutje; unë nuk shkoj në terren për reklam, për herë të parë nuk kam marrë email zyrtar, ia kam thënë ministrit Sfeçla, ministrit të mbrojtjes, ministrit të pushtetit lokal, vazhdimisht kemi marrë emaila zyrtar kur ka përmbytje prej institutit. Kur unë kam dalur në terren, njerëzit kanë qenë në gjumë, jemi aktivizuar pas gjysmës së natës sepse ka qenë befasi edhe për neve. Ne ngadalë po e përmirësojmë infrastrukturën për mbrojtje nga vërshimet dhe përmbytjet, kemi prioritet për këtë vit dhe për vitet në vazhdim sepse janë kontrata të mëdha. Dikush thotë; pse nuk po vazhdojnë kontratat?... Sepse ende 20%-shi i famshëm nuk është zbatuar. Menxi që kam arritur në vërshime t'i bindi operatorët. E dini që këto kontrata për të cilat po flas janë lidhur në vitin e kaluar dhe çfarë ndryshimi radikal të çmimeve ka ndodhur ka bërë që operatorët nuk vazhdojnë punën përderisa të ketë ndonjë ndihmë nga qeveria, ligji 20% kundër inflacionit, por ende nuk ka hyrë në fuqi, shpresojmë në këtë muaj. Kësaj radhe në qytet sa i përket përmbytjes kemi shpëtuar, është interesat edhe pse hapja e kanalit nga shtavica për Fortesë e ka ndihmuar qytetin në njërin anë dhe e ka rënduar gjendjen në Fortesë sepse uji është lëshuar më lehtë. Supozojmë që Ratkoci i ka shtretërit më mirë të rregulluar, në këtë rast kur uji e merr Ratkocin, nuk di çka të them... Ne nuk kemi kapacitet Burim Krasniqi, për financim të projekteve që janë në plan të ministrisë së bujqësisë për drenazhimin e tokave bujqësore sidomos te fytat e ngushtë në ura hekurudhore dhe përtej hekurudhës ose janë prona private, ose lidhen me komunën e Gjakovës ose dikush duhet të merret me trajtimin e shtratit të drinit të bardhë. Pra, në çoftëse është investuar ndonjëherë në Kosovë për trajtimin e këtyre situatave problematike, është investuar në komunën e Rahovecit nga komuna e Rahovecit. Në komunat tjera këto punë shkojnë "llugë", shtretër ka vetëm brenda vendbanimeve. Në çoftëse ne bëjmë zgjidhje dhe i hapim vijat përtej hekurudhës, nën hekurudhë e deri në dri, do të zvogëlohet deri në skajshmëri potenciali i vërshimeve dhe përmbytjeve. Ju anëtarët e kuvendit e dini që për shkak të keqklasifikimeve ministria sivjet n'a ka hequr kodin për pastrim të lumenjëve duke e vendosur në kategorinë mallra dhe shërbime. Sivjet e kemi pasur projektin e gatshëm për pastrimin e vijave në Krushë, Celinë dhe të vazhdojmë tutje, por tani nuk kemi të drejtë të hapim procedurë sepse nga investimet kapitale ka kaluar në mallra dhe shërbime. Unë nuk kam dëshirë t'a luaj rolin e viktimës e as nuk përfitoj në momente, politikën dhe përgjegjësinë publike nuk e bëj me incidente, duhet investim i madh prej moshës së re për të qenë një politikan aktiv. Mundësia jonë ka qenë t'i formojmë 7 komisione dhe komisionet kanë bërë një raport preliminar; deri 1.5 milion mund të shkoj vlera e dëmeve në bujqësi, mos harroni që në 2018 ka qenë gati 5 milion. Në amvisri; deri më tani i kemi rreth 870.000euro dhe mund të kaloj mbi 1 milion sepse ende janë komisionet duke punuar. Për herë të parë vërshime kemi pasur edhe në Zatriç, nuk di çka të bëj më! Vërshime në bjeshkë!... Në Patoqan nuk ka vërshime, mesiguri uji ka shkuar në Fortesë. Për herë të parë nuk kemi vërshime në Çifllak, nuk kemi vërshime në Kramovik. Pra, parashikime të sakta për dëme nuk mund të kemi deri në përfundim të raportit. Po përgatitemi t'a dërgojmë raportin në adresa të sakta të ministrisë së linjës ministrisë së bujqësisë një kopje, ministrisë së administrimit të pushtetit lokal, ministrisë për ndërmarrësi tregti dhe industri, zyrës së kryeministrit dhe të shohim, fjalët i kemi të mira, së paku të kompenzohen sepse njerëzit janë dëmtuar në momentin kur kriza është e madhe dhe shumëplagëshe. Kanë ardhur tre ministra, përfshirë edhe zv.ministrin e bujqësisë, i kemi diskutuar këto tema. Mbrëmë në lidhje telefonike me ministrin Mehaj, kam kërkuar përfshirjen e FSK-së të na ndihmojnë me manikeritë e tyre si dhe uniforma e tyre na hapë rrugë te intervenimet te pronarët privat. Unë një herë i kam veshur çizmet, atëherë kur ka qenë koha e Luftës së ushtrisë çlirimtare të Kosovës. Kështu për qejf kurr nuk i kisha veshur, kjo nuk do të thotë që kisha ecur dathë, ka lloj lloj këpuca tjera, por për çizme nuk është nevoja... Dëmet preleminare në infrastrukturë i kemi 236.000euro, regjistrimi edhe vlerësimi i dëmeve vazhdon. Kemi dy objekte të dëmtuara shumë, QMF-ja në Fortesë që nuk e di se çka duhet të bëjmë me të, n'a tregon komisioni dhe shkolla në Sopniq e cila është në shënjestër nëse do të ketë vërshime tjera në fshat, sepse është në pikën e ulët. Ka mundësi që vlera totale e dëmit në amvisri, ekonomi familjare, biznese, infrastrukturë publike dhe në bujqësi të kapë vlerën rreth 3milion. Nuk e kemi raportin përfundimtar sepse nuk ka shancë që për 5 ditë të përfundoj kjo punë. Javën

tjetër besoj që e kemi raportin të sakt me listë emërore të protokoluar të dërgohet në qeveri në zyrën e kryeministrit dhe në ministritë që llogariten që mund të na ndihmojnë. Te kolektori në Krushë të Madhe; ne e kemi grantin e performancës 1.148.000euro. I kemi marrur 592.000euro këtë vit, pjesën tjetër ende jo, një pjesë e grantit është ndarë pikërisht për kolektorin në Krushë të Madhe dhe për pjesën e infrastrukturës që lidhet me drinin e bardhë. Sa i përket qerdes; sivjet nuk mund të funksionalizojmë as qerdhen në Krushe, as në Xërxe as në Ratkoc, objektet janë gati ndërsa nga viti i ardhshëm i kemi 25 vende të lira për funksionalizim me personel pedagogjik-edukativ për qerdhet tona. Sivjet nuk kem të drejtë për konkurse, vitin e ardhshëm kemi fat që është plotësuar kërkesa jonë drejtuar ministrisë së financave dhe ministrisë së arsimit për 25 vende të reja dhe mund t'a shihni në qarkoren e dytë buxhetore, është publike.

Kryesuesi – Faleminideri kryetar. Sot edhe gjethet kanë filluar të bijnë, zyrtarisht fillon stina e vjeshtës. Baci Rasim e ka fjalën.

Rasim Fazliu – Faleminiderit kryesues. Përshëndetje për juve, kryetarin, nënkryetarin, anëtarët e kuvendit komunal, drejtorët, përfaqësuesin e OSBE-së, media dhe të gjithë të pranishmit në sallë. Kryetari n'a dha sqarime të mjaftueshme rreth situatës së vërshimeve aktuale të fundit që kanë ndodhur në komunën tonë. Meqë i mora këto sqarime nuk do t'a zgjasë, por do të thoja se; Fushat e Celinës – tokat i vërshon lumi "Bellaja" dhe konsideroj që kjo çështje është dashur me mundësi të zgjidhet më herët, mirëpo ne nuk mund të kthehemi prapa, por kisha propozuar te qeverisja komunale që lumi "Bellaja" të jetë së paku gjithmonë i hapur, e nëse ndodhin vërshimet të shumta që nuk e përballon kuptohet në gjithë botën që ndodhin dukuri të tilla, nuk kemi çfarë të bëjmë por së paku mos të jetë arsyeja që për shkak të mbylljes së shtratit ose mos hapjes së shtratit në mënyrë të duhur të na vie uji të na mbulon tokat, pastaj dëmet janë shumë të mëdha. Kërkoj që kjo punë mos të përsëritet më në vërshimet tjera sepse vërshime do të ketë gjithmonë sa të ekzistoj njerëzimi, së paku konkretisht lumi "Bellaja" në çoftëse ka mundësi buxhetore komuna të punohet dhe të jetë i hapur në mënyrën më të mirë të mundshme. Faleminiderit, kaq pata.

Bejtullah Deliu – Faleminiderit i nderuar kryesues, kryetar, zv.kryetar, drejtorë të drejtorive, kolegë asambleistë, media dhe gjithë të pranishëm. Deshta të ndalem në tre pika; e para është kënaqësi që klubi i futbollit është duke avasuar, drejtori nuk qenka këtu – deshta t'ia jap një lavdatë të vogël për angazhim por po i kthehna në kritikë. Nëse DKRS së bashku me kryetarin kanë planifikuar që në këtë ecuri t'i dalin në krahë klubit shumë më tepër që të kaloj në superligë ku dhe bëhet një nam më i madh të ngritët edhe komplet Rahovecit sepse futbollit është sporti më i popullarizuar në Europë. A keni menduar që të bëni ftesë nga institucionet drejtuar bizneseve për përkrahje më të madhe për klubin, më shqetësues është planifikimi i ndërtimit të sheshit qëndror, në këtë pikë a keni ndonjë zgjidhje konkrete, nëse fillon rrënimi i kësaj fushe, ku do të zhvillohen ndeshjet, stërvitjet?... E dyta; drejtorja për arsim, vitin e kaluar keni ngecë në nxehmjen pothuajse në të gjitha objektet e shkollave, a do të ndodh e njëjta gjë këtë vit, a keni ndërmarrë diçka që të mos jetë kjo situatë?... E treta; te drejtorja për bujqësi, jemi dëshmitarë të faktit që po ndahen grante të subvencionimeve të ndryshme sidomos pjesë motorrike, plugje, traktorë të vegjël vit pas viti, mendoj që është mirë të merret një hap tjetër tutje të fokusohet drejtorja bashkë me menaxhmentin që të kemi zgjidhje për produktin final për bujqit, ata më herët kanë punuar edhe pa këto mjete motorrike pothuajse i tërë bereqeti i ka ngelur nëpër fusha. Është shumë më mirë që komuna të konceptohet në ndonjë projekt më madhor, t'i harroj këto grante të vogla, mirë është të vazhdohet me serra sepse nëse bujku ka vend ku e shet produktin final, besoj dhe ju garantoj që mjetet motorrike mund t'i blejë vet vitin e ardhshëm. Besoj që është më mirë të bëhet një shpallje ndërkombëtare me një organizatë që merret profesionalisht me bujqësi, të investohen këto mjete më mirë. Mund të marrim shembull Austrinë e cila është e njohur për bujqësi dhe mesiguri ka organizata që operojnë për t'a bërë selektimin e fushave për mbjelljen e produkteve të ndryshme dhe të përshtatshme. Në fund kjo organizatë të na certifikoj dhe të na udhëzoj nga A deri në Zh se si bëhet puna e tillë. Poashtu besoj që nëse një organizatë ndërkombëtare të certifikon, t'a jep një vulë që produktet tona janë të shëndetshme dhe kualitative, atëherë besoj që tregu ndërkombëtar është i hapur vetëm me atë vulë. Mendoj që kjo është mënyra më e mirë të investohet në produktin final, në ide se si të shitet sesa forma që është zgjedhur ndërvite me nga 1 milion euro duke shpërndarë plugje, traktora të vegjël. Të zgjerohemi me një diapazon shumë më të lartë e më të gjerë për bujqësi, këtu fabrika të mercedesit nuk kemi, kemi

hijqësinë që mund të na bie të hyra bukur të mëdha. Sa i përket vërshimeve, ndoshta mungesa e drejtorisë për mbrojtje dhe shpëtim ka patur efekt, po të ishte do të reagonit më shumë.

Sejfullah Sejfullahu - Faleminderit kryesues, përshëndetje kryesues, kryetar, kolegë asambleistë, drejtor, të gjithë ju. Për punën e Agro-festës, e kemi lënë me 15 shtator, nuk arritëm të bëhemi gati, tani vërshimet pak na kanë çrregulluar, por sigurisht në fund të muajit do të mbahet?...Nëse do të mbahet, do t'a shtyej operacionin deri pas përfundimit të Agro-festës. Nëse se mbajmë është ajo që kanë ndodhur shumë gjëra jo të mira shkaku i vërshimeve edhe une gjithashtu shumë ia kam pa "sherrin". Pyetja tjetër; ditë më parë e keni pritur ministrin e kulturës z.Çekun, po pyes lidhur me sallën e sporteve në Krushë të Madhe, keni biseduar për projekte në përgjithësi, por konkretisht për sallën e Krushës a e keni ndërmarrë diçka?...

Ilir Pallqa – I nderuar kryesues, kryetar, kolegë asambleistë, drejtorë të drejtorive. Në fillim të rrugës "Gëzim Hamza" më saktësisht përballë lokalit n'Qoshbar është një mur jo shumë i gjatë që e kufizon tërësisht hapësirën për këmbësorë. Aty me doemos duhet të krijohet një hapësirë për këmbësorë me çfarëdo lloj forme, ngase mes tjerash asaj pjese i paraprinë një udhëkryq, e gjasat që të ndodh më e keqja nuk janë të vogla sidomos kur e marrim parasysh që ajo rrugë frekuentohet në baza ditore nga nxënësit të dy prej shkollave më të mëdha të komunës. Pyetja për këtë çështje; A është në pronë publike një mesatare prej 1m nga fillimi deri në mbarim të atij muri. Sipas gjeoportalit mua më figuron që po, nëse po, merrni masa- nëse jo, duhet shpallur si interes të përgjithshëm publik dhe vazhdojmë me procedura të tjera. Duhet të marrim vendime, kemi përgjegjësi edhe për vendimet që nuk i marrim. Kryetar, mes tjerash, ju vazhdimisht i keni thurur lavde pronarit të asaj prone që lavdet e bëra nuk i kontestojmë, por meqenëse ju edhe ai po krijoni një farë sinergjie të interesit publik, pse nuk bëni hapa konkret për këtë çështje, përderisa është në interes të banorëve, apo ke frikë që mos ndoshta prishen raportet shoqërore.

Leonard Morina – Përshëndetje kryesues, kryetar, drejtorë të drejtorive, gjithë të pranishëm, qytetarë. Në webfaqen e komunës është një tender që është hapur me datë; 07.06.2022 dhe është mbyllur me 27.06.2022, kjo kontratë është për pajisjeve të shkollave me tabela digjitale, 20 tabela. Janë 3 kompani që kanë ofertuar; kompania e parë ka qenë me 43.800, e dyta me 54.700, e treta me 59.800euro. Kontrata është nënshkruar me kompaninë e cila nuk është më e lirë për 10.900euro d.m.th me 54.700euro janë blerë 20 tabela, nëse do të zgjidhej kontrata më e lirë, do t'i blenim edhe 5 tabela tjera. Këto tabela digjitale janë paguar me çmim 2735euro. Pse nuk është zgjedhur operatori më i lirë, por është zgjedhur operatori i mesëm 54.700. Në një kontratë tjetër të nënshkruar me datë 08.12.2021, riparimi i objekteve shkollore. Një kompani e ka fituar kontratën me 9060euro ku parashihi dy shkolla; shkolla "12 Maji" në Ratkoc dhe "Rilindja" në Çifllak. Te kjo e fundit parashihi të investohen diku 3551euro për renovimin e kulmit dhe aty në kontratë thuhet; të vendoset xhamat solarë në kulm. A janë vendosur xhamat solarë?

Drilon Mustafa – Përshëndetje për të gjithë. I nderuar kryetar z. Smajl Latifi, kryesues z. Kafexhiu, drejtorë të drejtorive, kolegë. Deshta të ndërlihem te menaxhimi i mbeturinave, komuna jonë prinë për së mbari, por problemi është te menaxhimi i mbetjeve të ngurta të bagëtive, këtu deshta t'ia bëjë një kërkesë drejtorisë së inspektoriatit që në çdo banim në komunën tonë të inspektohet kjo çështje dhe të merret një vendim. Pyetja e dytë është për drejtorin e arsimit që lidhet me terrenin sportiv të shkollës në shkollën "31 Marsi" në Gurë të Kuq, e kemi parasysh edhe ngritjen e çmimeve dhe neglizhencën e operatorëve, por ka shkuar një kohë e gjatë dhe mendoj që është afati i fundit që drejtoria t'a kushtëzoj operatorin ose t'a eliminoj tërësisht nga gara. Te transporti i nxënësve të shkollës së mesme të Gurit të Kuq, komuna iu siguron transportin vetëm për një rrugë dhe mendoj që është jo në rregull sepse rrugën tjetër duhet të vijnë në këmbë. Nëse keni mundësi buxhetore kërkoj nga ju që transporti të sigurohet vajtje-ardhje.

Kryetari – Faleminderit. Po, kf Rahovecin e përgëzojmë për sukseset edhe klubin e hendbollit i cili është jashtëzakonisht mire. Këtë vit i kemi përkrahur aq sa kemi patur mundësi, nuk është që jemi të kënaqur me përkrahje, nejtë edhe ata me përkrahjen tonë. Në çoftëse ne i bëjmë ftesë direkt bizneseve direkt si institucione, mund të ketë ndonjë situatë diskutabile sepse ekziston mundësia të keqinterpretohet. Kjo nuk do të thotë që nuk bëjmë punë. Në takim e pata ministrin e kulturës rinisë dhe sporteve z. Hajrullah Çeku, biseduam shumë gjëra kontrete, kemi biseduar për memorandumun e datës 9 prill 2019 që kanë mbetur në letër dhe pa zbatim. Aty përfshihen stadiumi në qytet në Rahovec, palestra e sporteve në Krushë të Madhe dhe stadiumi në Ratkoc. Lëvizje konkrete mund të ketë te stadiumi në Rahovec për këtë vit, për palestrën në

Krushë dhe stadiumin në Ratkoc nuk ka shpresë këtë vit. Për herë të parë po e them në kuvend që me ministrin e kemi biseduar edhe lokacionin e stadiumit; ka qenë fat i mirë që qeveria që dikush po i thotë e PAN-it, në atë kohë na ka dhënë 7 hektarë të epopeja e UÇK-së mbi qytet, sepse nuk ka vend tjetër të përshtatshëm ose ndryshe hyjmë në prona private. Është një ide që t'ia kërkojmë edhe "Stone Castles", e kemi biseduar edhe me ministrin. Problemi është që pronat e "Stone Castles" janë kompleks bujqësor, e dyta; nevojiten 2 ose 3 hektarë por edhe në çoftëse ne e miratojmë në kuvend, gjithashtu ministria e kulturës është "për", ministria e planifikimit nuk është "për", ajo e bujqësisë nuk është "për" po flasim ligjërisht, jo pse iu mungon ndoshta vullneti, plus ne mund të ballafaqohemi me kërkesën për shpronësim që ndoshta "Stone Castle" kërkon shpronësim. Në fund në çoftëse nuk ka alternativa tjera, duhet të bëhet atje ku është. Sheshi qëndror në qytet është në fazën e vlerësimit. Do të kujdesemi që mos të krijojmë vakum duke shqyrtuar mundësinë që një herë të hyjmë me punë në pjesët ku nuk dëmtohet pozicioni i klubit sepse procesi i ndërtimit të sheshit nuk parashihet për 2 ose 6 muaj, por do të zgjatë që ndërkohë mund të na lëviz ndonjë ide për stadium të ri dhe në momentin kur e kemi stadiumin e ri, punimet fillojnë në stadiumin ekzistues të parapara me plan. Ministria është vonuar 3 vite në memorandumin e mirëkuptimit me ministrin Kujtim Gashi në 2019. Në procedurë të prokurimit ka patur lëvizje, janë anuluar procedurat, kodet ekzistojnë por para nuk ka. Këta tani dëshirojnë t'a ridizajnojnë që të kemi zhvillime në stadiumin e qytetit ndërsa në vitin e ardhshëm në stadiumin dhe palestrën sportive në Krushë të Madhe, ndërsa për Ratkoc meqenëse njëherë klub nuk ka, mos nguteni hiç. Te ngohja qëndrore, furnizimi me dru dhe pelet; kemi patur kontratë siç e dini, kemi rishpallur procedurat për shkak të rritjes së çmimeve sepse janë ndërprerë kontratat ngase operatorët nuk kanë patur llogari të vazhdojnë punën me këto çmime. 200euro ka qenë peleti, në Pejë kanë lidhur kontratë me 750euro 1ton pelet, me këtë çmim mund t'a marrim edhe ne, prandaj jemi detyruar t'i ndërprejmë kontratat sepse operatorët nuk dëshirojnë të punojnë. E kemi rritur vlerën dhe besoj që shpejtë do t'i lidhim kontratat sepse janë në proces të vlerësimit edhe për dru edhe për pelet. Mekanizmi bujqësorë; Në këtë kuvend iu kamë thënë, po e përsërisë, nuk do të ketë më mekanizëm bujqësorë por ne jemi të obligueshëm t'i përmbushim kontratat aktuale që i kemi. Nuk do të kemi kontrata të reja, në vitin e ardhshëm mund të futemi në impute bujqësore, po përpiqemi t'a rregullojmë tregun e madh të rrushit aty ku mbahet "Hardh festi". Jemi dëshmitar në vështirësinë e plasimit të produkteve bujqësore megjithëse kemi rezultate të mira dhe na bëjnë kranarë që prodhimet tona megjithatë mund t'i gjejmë në tregun rajonal dhe evropian. Tjetër, mund të bëjmë një sigurim të një lehtësimi për plasimin e produkteve tona duke angazhuar ndonjë organizatë, por unë mendoj që shteti duhet t'a organizojë këtë organizatë sepse kapacitetet e një komune për përfshirje të një organizate të certifikuar për të dhënë inpute të plasimit tutje në tregun e jashtëm është diçka që mund t'a bëjmë me kapacitetet tona por është problem jo vetëm te ne por në gjithë republikën e Kosovës.

Qendra për maganizim është në fazën e vlerësimit në procedurë të prokurimit. Sejfullah Sejfullahu- Agro festa; Unë me dëshirë e kisha mbajte, por varet edhe prej vullnetit të bujqëve dhe të përfaqësuesve nga Krusha e Madhe, 2 asambleistë, drejtori i bujqësisë etj... Po nuk e di a do të mund t'a organizojmë sivjet Sefë edhe pse dëshirë kemi. Unë e kam mik Ruzhdi Haxhijahën, e kam pasë edhe Halimin. Nuk e kam mik të interesin individual. Ata bëjnë një punë të mirë, prodhojnë, kanë edhe të punësuar etj etj... Diskutimet rreth atij murit në rr."Gëzim Hamza" nuk është që kanë filluar me neve, por shumë më herët, sepse ka qenë një ide të zhvendoset muri dhe ka patur një pajtim në mes komunës etj etj... Muri është në pronë private. Ortofotot neve na gënjejnë pak se nuk tregojnë saktë. Është e vërtetë që është ngushtë, ato gjëra që janë "n'Qosh bar", ato do të hiqen sepse e pengojnë trotuarin. Ajo rrugë është fyt i ngushtë, por mos harroni që ka prona private. Mund t'a bëjmë ndonjë zgjidhje me një projekt që është në procedurë të tenderit, është projekt i fituar nga ministria e infrastrukturës e kemi në memorandum me Hysen Durmishin, hapja e ofertave bëhet në fillim të muajit nëntor sepse projektet e mëdha e kanë afatin 40 ditë për njoftim dhe ajo është një nga rrugët që do të trajtohet edhe me ujëra atmosferik dhe shpresojmë që gjatë këtij procesi t'a lirojmë rrugën – fytin e ngushtë, a kupton Ilir?!... duhet pak presion, pak mirëkuptim, pak të hyjmë në lojë sepse është rrugë shumë problematike me qarkullim të madh. Deri më tani nuk ka ndodh asnjë e keqe por kjo nuk do të thotë që nuk mund të ndodh në të ardhmen. Te pajisjet digjitale, Leonard; Të them të drejtën "qorba e lirë t'i djegë buzët" kjo fjalë e urtë është shumë e vërtetë, këtë mund t'a dijë vetëm prokurimi se

pse është zgjedhur çmimi i mesëm, e jo ai më i liri, ndoshta operatori nuk ka dokumente!... Në ligj të prokurimit thuhet; operatori më i lirë po i përgjegjshëm, kjo është baza ligjore e dokumentacionit. Do t'a lus shefin e prokurimit të na jep një sqarim në seancën e radhës, sqarim zyrtar pse ka ndodh kjo. A ka ndodh kulmi në shkollën "Lirindja" me ato xhamat solare apo jo dhe çka ka ndodh me "12 Majin" këto përgjigje mund t'i jep Avniu. Te terrenet sportive Drilon, kompania është shumë e vertetë që është joserioze, e papërgjegjshme, kuptohet edhe pasojat e rritjes së çmimeve na shkaktojnë vonesa dhe jemi duke e shqyrtuar mundësinë të operojmë shpejtë ose t'a ndërprejmë kontratën me ata dhe të lidhim kontratë të re me tjetër operator. Te transporti në Xërxe nuk mund t'a dij këtë përgjigje, vetëm e di që ne nuk i përcaktojmë linjat, linjat i përcakton departamenti i posaçëm që është në ministri të transportit, Burimi e din më mirë. Mbetjet e ngurta; mund të themi që inspektoriati jonë e ka dënuar një person 2000euro që ka gjuajtur mbetje shtazore në dri, 1000euro e ka paguar brenda 5 dite.

Bejtullah Deliu – Faleminderit kryesues. Kryetar, nuk mora përgjigje konkrete rreth problematikës që e shpalosëm sepse është e pakuptimtë menjëherë të kyçemi se çka kishit mundur ju të realizoni me këtë problematikë rreth produktit final. Më shumë hyre në diskutim se çka mund të bëjë qeveria etj etj... Por është mirë që drejtorja të angazhohet në këtë pikë së bashku me juve dhe të bashkëpunoj me biznese të bëjë një konkluzion që këtë mjete që janë ndarë me vite të ridestinohen, mos t'a presim qeverinë por të marrim një hap sepse kur t'a sheh qeveria që komuna po bën hap të mirë sigurisht që do të kemi përkrahje edhe nga qendra. Shumë është ide e qëlluar që të marrim një organizatë ndërkombëtare të certifikuar që garanton në produktet finale. Nëse investojmë në këtë projekt, produkti automatikisht është i shitur, vetëm duhet kohë, durim dhe punë nga bujqit. Në vend të mjeteve bujqësore që janë dorëzuar çdo vit të merret një vij apo kahje tjetër në produktin final që është në mungesë dhe frikë e përvitshme e të gjithë bujqëve. E përmendët "Agro Celinën" vet kam qenë në një vizitë – është një biznes me standarde evropiane dhe nëse ky biznes ka sukses me ide dhe mjete vetanake, pse të mos përkrahet në produkte dhe zgjerimin e asaj pjese, e përgëzoj atë biznes dhe e di që është shumë serioz.

Ilri Pallqa – Faleminderit kryesues. Pyeta se a është në pronë publike, kryetari e dha përgjigjen, në seancën tjetër pres përgjigjen zyrtare me email ose material. Ajo hapësirë është shumë e ngushtë, nuk ka vend as për kontinier as për asgjë dhe do të ishte shumë mirë që ju dhe pronari i asaj prone t'a gjeni një mirëkuptim. Gjetja e mirëkuptimit të nderon ty edhe pronarin, neve n'a lehtëson ecjen.

Kryetari – Qendrat grumbulluese dhe përpunuese edhe sivjet do t'i mbështesim pak, me disa grante si komunë dhe marrim pjesë edhe në disa partneritete që ata i bëjnë. Kur qendra grumbulluese "Agro Celina" kur të bënë partneritet ose fiton ndonjë grant, marrim pjesë edhe ne me kapacitetet tona. Tjetra, ajo pjesë unë zyrtarisht e di që është pronë private Ilir, por kam dëshirë që kadastrat të thotë që është pronë publike, por edhe nëse është pronë private ne do të provojmë t'a zgjerojmë atë pjesë.

4. Informatë nga DKRS-ja për muajin e mërgimtarëve prej 15 korrik deri më 15 gusht 2022;

Afrim Dina – Faleminderit kryesues, i nderuar kryetar, nënkryetar, drejtor, anëtarë të kuvendit. Ne edhe në bazë të planit të punës së kuvendit e kemi informatën për muajin e mërgimtarëve. DKRS ka mbajtur aktivitetet tradicionale, muaji i mërgatës 15 korrik-15 gusht, si bartëse e aktiviteteve për muajin e mërgatës përgjegjëse ka qenë DKRS. Manifestimi ka filluar sipas agjendës e cila ka qenë e përpiluar dhe e hartuar nga kryetari i komunës sonë, kjo agjendë ka qenë edhe në webfaqen e komunës. Mbarëvajtja e procesit 30 ditorë; manifestimi ka filluar me datë 15 korrik-15 gusht, konsiderojmë që ishte një organizim dhe aktivitet më i madh deri më tani. Me qëllim të ofrimit të mundësisë për takime reciproke ndërmjet mërgimtarëve tanë dhe autoriteteve lokale. Komuna e Rahovecit gjegjësisht DKRS ka organizuar aktivitete të shumta duke filluar nga turneu në futboll, shah, koncerte të ndryshme, sofrën e mërgimtarëve. Kryetari i komunës për një muaj rresht ka pasur takime të rregullta me mërgimtarë duke filluar nga ora 10:00 çdo ditë duke shpalosur mundësitë dhe thirrjet rreth investimeve në komunën tonë e kështu me radhë. Kemi patur grupe të ndryshme të muzikës; Fisnikët, 04 band Xheriko dhe artistë tjerë të ndryshëm nga komuna jonë. Përveç koncerteve janë mbajtur edhe sofrat e mërgimtarit që janë pritur shumë mirë, në Drenoc, Krushë e Madhe dhe Ratkoc. Gjithashtu në kuadër të këtyre manifestimeve janë bërë edhe dy promovime të librave; "Deri në frymën e fundit" për dëshmorin Skender Gashi me autor Qemajl Krasniqi. Libri "100 kultivarë" nga Rexhep Kryeziu.

Është organizuar turneu dy ditorë ndërkombëtar në shah "Korriku 98" ku kanë marrur pjesë 106 garues nga Shqipëria, Finlanda, Kosova, Austria, Mali i zi dhe Maqedonia e veriut. Më posht në material i keni të gjitha aktivitetet tona me anë të fotove, ku për secilin aktivitet kanë marrë pjesë një numër i konsiderueshëm i qytetarëve. Gjatë muajit të mërgatës me datë 21 korrik ka qenë edhe përkujtimi i dëshmorëve të majës së Shkodranit, ku në të njëjtën ditë është bërë përmirësimi i hapësirës rekreative për të rinjtë. Për fund, e falënderoj policinë e Kosovës të cilët për një muaj rresht n'a kanë përcjellur që çdo aktivitet të ketë mbarevajtje ashtu siç duhet, gjithashtu falënderoj edhe bizneset në rrugën "Xhevat Kasapi" të cilët kanë qenë të gatshëm dhe kanë kontribuar jashtëzakonisht shumë.

Besmire Bytyqi – Faleminderit kryesues. I nderuar drejtor, shfrytëzoj rastin për të shprehur mirënjohje dhe përgëzimet e mia për të gjitha organizimet gjatë muajit të mërgatës, juve dhe stafit tuaj, mos e harro zanatin vitin tjetër pak më mirë e pak më shumë.

Merisa Sharku – Përshëndetje për të gjithë. Besa duhet të na lë neve të opozitës t'a bëjmë ndonjë lavdatë. Për këto organizime e përgëzojmë edhe ne si opozitë drejtorin e kulturës, njashtu kërkesa jonë është që këtë organizim të vazhdojnë edhe në sezona tjera. Përveç muajit të verës, mërgimtarët vijnë edhe në sezonin e dimrit, mirë është të ketë organizime që i përshtaten kohës dhe klimës por gjithësesi mos të mendojnë manifestimet.

Ilir Pallqa – Për organizimin e mbrëmjeve të kafesë e vogla, e falënderojmë kryesuesin për idenë kreative që e ka dhënë. Faleminderit kryesues, ne si grup njihemi si kreativ dhe më vë mirë që je pjesë e jona.

Kryesuesi – Faleminderit Ilir, po kushtëzohet edhe unë t'i falënderoj anëtarët e ekzekutivit dhe komisionin organizues që ka qenë për një organizim tjetër, ku edhe këta e kanë shprehur vullnetin dhe gatishmërinë për t'i dëgjuar idetë e secilit dhe që ka funksionuar shumë mirë.

Bejtullah Deliu – Nuk e di a të filloj me lavdërime unë. Drejtor, në fushë në Dejnë një gropë e madhe është hapur, a mund të na tregoni sepse është fushë e re, pse kaq shpejtë dhe çka është ndërmarrë.

5. Shqyrtimi dhe miratimi i vendimit për planin komunal për menaxhimin e mbeturinave 2022 – 2026;

Përparim Krasniqi – Faleminderit kryesues, prapa suksesit të drejtorit të kulturës qëndron drejtori i shërbimeve publike sepse unë ia kam dhënë vendimit për kufizimin e lëvizjes në atë rrugë, pak shaka – kërkoj falje, përshëndetje edhe një herë për të gjithë. Në diskutim publik ka përfundur plani i menaxhimit të mbeturinave prej datës 11.08-11.09 sipas ligjit për qeverisje lokale, poashtu është mbajtur edhe një diskutim publik në sallën e kuvendit me datë 25.08.2022. Planin e menaxhimit ka afat pesë vjeçar në këtë rast komuna e Rahovecit ka zotim dhe obligim ligjor mjedisin ekologjik në komunë dhe përmirësimin e vazhdueshëm të shërbimit të qytetarëve. Ky plan i ka të gjitha specifikat që i kërkon ligji, duke përfshirë operimin, strategjinë dhe volumshmërinë të menaxhimit të mbeturinave, ndarjen, inkasimin, koston e shërbimit, siç e dini sipas ligjit, komuna e Rahovecit është e obliguar që të caktoj edhe tarifat për mbledhjen e tyre mbeturinave. Në përfundim të këtij plani janë paraparë objektivat dhe vizioni i këtij plani për periudhën 2022-2027. Për çdo këshillë dhe sugjerim, jemi këtu për të dhënë informata shtesë.

Besmire Bytyqi – Faleminderit kryesues, gjithashtu faleminderit edhe ty Përparim për këto informacione. Unë kam vetëm disa ankesa të menaxhimit të mbeturinave – të kompanitë përkatëse. Hapësirat publike nuk po mirëmbahen aq sa duhet, parqet e vogla, oborret e ndryshme, varrezat e dëshmorëve dhe të tjera. Gjendja nuk është aq e mirë sa ka qenë vite më parë. Kërkoj nga ju si drejtor që të bisedosh me të gjithë operatorët ekonomik të cilët i mirëmbajnë hapësirat publike që me më seriozitet t'i marrin këto punë.

Kryesuesi – Faleminderit Besmire, dikush tjetër ndonjë gjë rreth kësaj pike?... Nëse jo, atëherë po e vendosim në votim, kush është për këtë plan?...Me shumicë unanime, miratohet edhe vendimi për planin komunal për menaxhimin e mbeturinave, përfundon edhe pika e pestë e rendit të ditës. Vazhdojmë me pauzë...

Kryesuesi – Përshëndetje edhe një herë për të gjithë, shpresoj që keni kaluar një pauzë të mire dhe xhuma të pranuar për ata që e praktikojnë.

6. Shqyrtimi dhe miratimi i vendimit për miratimin e buxhetit për vitin 2023;

Afrim Limani – Përshëndetje për ju kryesues, kryetar, nënkryetar, asambleistë dhe gjithë të pranishëm. Siç jeni në dijeni edhe pse pak me vonesë por me datë 16.08.2022 ka arritur qarkurja e dytë buxhetore ku edhe janë përcaktuar limitet dhe tavanet buxhetore dhe pjesa apo “hisja” e buxhetit të komunës së Rahovecit për vitin 2023 si dhe projeksionet 2023-2025. Nuk ka ndonjë dallim të madh nga qarkorja buxhetore por vetëm kemi një zbritje prej 50.000euro nga pozicionet, nga kategoria e investimeve kapitale janë rritur pagat prej 50.000euro. Ndryshim tjetër për të mirë është një shtim të stafit në qerdhe d.mth. për arsim rreth 21 vende dhe është zvogëluar stafi në shëndetësi, nga 69 në 52. Pra ky është dallim në mes të qarkores së parë dhe të dytë. Andaj buxheti për komunën e Rahovecit për vitin 2023 në total është prej 17.548.240 euro. Të hyrat vetanake 1.445.000, granti është 16.102.000 ku përfshihet granti për shëndetësi prej 2.600.000 dhe grantin e arsimit prej 5.872.000. Pra, dallimi nga viti 2022 në vitin 2023 kemi një rritje të buxhetit në vlerë prej 2.494.000euro, më pas buxhetin e kemi shpërndarë në projeksione në të gjitha kategoritë ekonomike që e keni materialin. Kalojmë te lista e investimeve kapitale, është e njëjta listë me atë që ju e keni, mirëpo këtu siç po shihet jemi korrekt dhe transparent me ju duke e parë përmbajtjen në tabelë, pjesa që janë të hijezuara me ngjyrë të verdhë, janë projekte kapitale të cilat janë nga viti i kaluar mirëpo departamenti i buxhetit i ka klasifikuar si keqklasifikime, prandaj këto nuk janë në listën e projekteve kapitale që i keni ju. Këto janë futur në kategorinë mallra dhe shërbime të cilat janë rritur për vitin 2023 dhe janë rreth 400.000euro. Në këtë tabelar është i prezentuar edhe buxheti i vitit 2022 si pasqyrë ose si masë krahasuese që ju ta keni si informatë dhe t’i shihni ndryshimet që janë bërë në projekte kapitale. Në fund e kemi listën për projeksionet e vitit 2023. Në kuadër të projekteve kapitale janë të futura të gjitha kërkesat e qytetarëve apo rreth 95%, që kanë dalur si rezultat i dëgjimeve buxhetore edhe pse juve ndoshta nuk iu doket që po, por për shkak të sistemit P.I.P (programi i investimeve publike) i cili nuk e lejon hapësirën t’i fusim të gjitha të dhënat, atëherë çdo kërkesë është në kuadër të këtyre projekteve. Për here të parë jemi shumë komod që vitin e ardhshëm krijojmë një stabilitet financiar. Ju e keni një listë të obligimeve kontraktuale e cila është 2.5 milion dhe nëse këtyre obligimeve iu shtojmë edhe disa projekte që janë në proces. Buxheti i investimeve kapitale në total për 3 vite është 20milion, aktualisht kemi kontrata në vlerë prej 15milion euro, e keni këtë document që e keni kërkuar. Obligime kemi rreth 8.5milion nëse ia shtojmë edhe vlerën e projekteve të kontratave të lidhura dhe në process të lidhjes, të gjitha së bashku bashkë me sheshin në total janë rreth 17milion euro, duke e ditur që kemi edhe 1.7milion të buxhetit të vitit 2022. Për fund, kërkoj nga ju që t’a votoni këtë buxhet, është buxhet i qytetarëve dhe duhet t’a votojmë për qytetarë.

Kryetari – Faleminderit kryesues, të nderuar anëtarë të kuvendit, drejtorë, përfaqësues që e monitoroni këtë mbledhje të kuvendit komunal, media, të nderuar qytetarë të komunës së Rahovecit. Sivjet janë mbajtur 34 takime publike nga kryetari dhe ekzekutivi i komunës në periudhën maj – qershor 2022, janë mbajtur 8 dëgjime buxhetore në periudhën gusht 2022, është mbajtur një dëgjim buxhetor nga KPF në gjysmën e shtatorit 2022. Është hera e parë që debatet, takimet dhe dëgjimet buxhetore përveç që i organizojmë në koordinim të plotë me KDI-në, kësaj radhe edhe me DEMOS-in që lidhet me funksionet e transparencës në hartim të buxhetit, poashtu për here të parë me rekomandim të këtyre organizatave kemi formuar një grup punues për trajtimin e kërkesave, shqetësimeve dhe nevojave që i kemi dëgjuar gjatë konsultimeve me qytetarë. Është hartuar edhe ky raport përfundimtar dhe mund të iu them që është bërë një punë e madhe rreth planifikimit, hartimit dhe ndarjes së buxhetit në përputhje me kërkesat dhe nevojat e komunitetit. Ju e keni kërkuar një listë të investimeve kapitale të projekteve të reja, projekteve në vazhdim, ku do të zbatohen këto projekte dhe cilat janë kontratat. Ky dokument është gati dhe e keni në duart e juaja. Poashtu keni

kërkuar një listë të obligimeve kontraktuale dhe një listë të obligimeve që ka komuna e Rahovecit në raport me operatorët e ndryshëm. Gjithçka që punohet në këtë komunë, kusht i domosdoshëm është stabiliteti financiar dhe përfshirja në projeksione të gjitha kontratat të cilat janë të lidhura me komunën e Rahovecit dhe eventualisht për ndonjë projekt të ri. I kemi kushtuar shumë vëmendje kanaleve të kullimit të tokave bujqësore, shtretërve të përrrenjëve, e kemi prioritetizuar sheshin qendrorë në qytet, që është një projekt shumë i madh capital, kemi përfshirë edhe dy projekte të reja siç është ndërtimi i shkollës në Xërxë dhe ndërtimi i aneksit të shkollës në Ratkoc. E kemi adresuar edhe zonën ekonomike që është një projekt jashtëzakonisht i madh, kemi bërë një memorandum mirëkuptimi me ministrinë e tregtisë industrisë dhe ndërmarrësi, kjo ministri jep 1.5 milion ndërsa komuna jonë 300.000euro. Të hënën kam edhe takim me ministren Rozeta Hajdari që të bisedojmë se kush do t'a mbuloj pjesën tjetër që mbetet. Pra mendoj që ky buxhet për vitin 2023 është përgatitur me vëmendje të shtuar, janë përfshirë prioritetet e komunës, kontratat e mëdha, borxhet që potencialisht mund t'i kushtojnë nga operatorët komunës tone, kemi adresuar rekomandimet e ZKA-së dhe kemi ardhur në një ngjarje ku diskutimi i buxhetit të jetë një ngjarje solemne. Pas hapjes së debatit dhe diskutimeve të vlefshme të cilat i mirëpresim, besoj që janë pjekur kushtet që të miratohet ky buxhet dhe të votohet nga secili asambleist i zgjedhur në komunën e Rahovecit. Besoj që ky buxhet ka prioritet në kulturë, rini, sport, bujqësinë, ka prioritet përkrahjen e ndërmarrjeve të mesme atyre të voglave, artizanateve, prioritet ka infrastrukturën publike – rrugë lokale, shtretër të përrrenjëve, kanalet e kullimit të tokave bujqësore, rrugët fushore sigurisht edhe ndryshimin e mbështjettjes në bujqësi që e përmendi edhe Bejtullahu, pra, jo më në menakizma bujqësorë. Ju ftoj secilin grup politik që mbi dallimet që potencialisht ekzistojnë ndërmjet partive, ju ftoj që t'a votoni për hirë qytetarëve të komunës së Rahovecit, ky buxhet do t'i zgjidh shumë probleme, shumë do të mbesin të pazgjidhura sepse nevojat dhe kërkesat e qytetarëve me mundësitë tona natyrisht kanë shpërputhje. Buxheti është 17.5 milion ku prej tyre 40% janë për paga. T'i kapërcejmë kufijtë partiakë në mënyrë që mos të kemi vonesa sepse drejtorisë së financave i mbetet punë serioze për harmonizimin e asaj që kërkon ministria e financave, departamenti i buxheteve komunale në mënyrë që të certifikohet buxheti pa vonesa dhe mos të humbin qytetarët e komunës për shkak të ndonjë paqartësie që mund t'a krijomë. Unë jam i hapur për të gjithë për ndonjë ide interesante që mund t'a buxhetojmë dhe paketojmë në buxhetin e vitit 2023, sidomos në listën e investimeve kapitale.

Leonard Morina – Faleminderit kryesues, përshëndetje për të gjithë. Ne e kemi analizuar buxhetin e vitit 2023 dhe e kemi parë që ky buxhet nuk është i favorshëm për qytetarët e komunës sonë. Jemi kundër kësaj shpërndarje buxhetore në projektet që filluar të zgjasin 5 deri në 10 vite. Projekte në vazhdim... projekte në vazhdim d.m.th 85.5% janë projekte në vazhdim dhe vetëm 14.5 janë projekte të reja. Sipas ligjit kjo nuk është dashur të ndodhte sepse 1/3-ta duhet të jetë projekte të reja dhe 2/3 projekte në vazhdim. Njëjtë edhe raporti i ZKA-së ka thënë që raporti është i kualifikuar për shkak të kësaj që kontratat janë shumë afatgjate dhe që komuna nuk i ka përmbushur obligimet që t'i lë kontratat 3 vjeqare. Te shpërndarja e buxhetit po ia nisi me zyrën e kryetarit meqenëse është në renditje; në vitin 2022 zyra e kryetarit ka në shfrytëzim 361.627euro ndërsa në 2023 është 393.520euro që i bie 31.893 euro ka më shumë në zyrën e kryetarit. Nuk e di kryetari a dëshiron rritje stafi apo rritje të cilësisë, apo janë rritur apetitet brenda zyrës. Kuvendit komunal buxheti i zvogëlohet në vitin 2022 ka buxhet më shumë, ndërsa buxheti i ulet në vitin 2023. Te shkollat fillore; në vitin 2022 kanë buxhet 4.587.934 euro, ndërsa në 2023 buxheti për shkollat fillore është zvogëluar për 37.000euro. Në shkollat e mesme; në vitin 2022 buxheti për këto shkolla është 1.307.559euro, ndërsa në vitin 2023 për 26.553euro më pak. Të gjithë thonë që në arsim duhet të investohet, por kryetari kësaj radhe ka zgjedhur që në arsim t'a zvogëloj buxhetin, ndërsa në zyrë të vet t'a rris. Te zjarrfikësat; këtë vit është paraparë për vitin 2023 rreth 10.000euro për izolimin e objektit të zjarrfikësve. Ata nuk kanë nevoj për fasada të jashtme sepse kushtet brenda objektit janë shumë të mjerueshme. Ne i kemi vizituar dhe aty

kanë nevojë për intervenim në secilin detaj që e ka brenda sepse zjarrfikësit janë të thirrur t'a shpëtojnë dikë, në anën tjetër janë në rrezik për vete që kërkojnë shpëtim prej komunës për shkak të kushteve brenda objektit. Bujqësia; Në bujqësi keni paraparë 440.000euro për vitin 2023, në disa seanca tjera kemi kërkuar që subvencionimi mos të ndodh vetëm për mjete bujqësore, kemi familje që merren me artizanate e që kanë nevojë të subvencionohet. Kjo kërkesë e grupit tonë nuk është marrë parasysh, po e shoh që nuk ka subvencionim për gra që merren me artizanate. Në fushatën e kryetarit kemi parë që ka premtuar që për lehonat do t'i rris subvencionet nga 200 në 300euro, jo që kjo nuk ndodhi, por, ky i ndali edhe ato 200euro që i kanë patur subvencion. Nuk e pashë që në këtë buxhet ka subvencionim për grate lehona që është premtuar nga 300euro. Te zona ekonomike në Optrushë, në vitin 2023 keni paraparë 50.000euro, kështu me radhë deri në vitin 2025 nga 50.000euro që bie 250.000euro. Nëse e shikojmë se çfarë projekti është ai, kjo i bie që ky projekt nuk do të përfundon as në vitin 2050. Kryetari tha që kemi një marrëveshje tani që do të investohet 1 milion e diçka dhe besojmë që kjo t'a shpëtoj zonën ekonomike të vetme që e kemi në qytetin tone. Te shkolla e Fortesës keni paraparë 200.000euro për vitin 2023, nëse e kqyrim me dokumente, kjo shkollë është e përfunduar dhe gati një vit nxansat mbajnë mësim në këtë shkollë, kjo mund të ndodh për dy arsye; njëra; për shkak se kryetari iu ka dashur të mirën nxënësve dhe ka dashur të sjellë një objekt të ri për ata ose para zgjedhjeve është dashur t'a prej shiritin e ndoshta i ka dalur edhe ndonjë votë më tepër, por besoj që është e para që e ka bërë për nxënësa. Te ndërtimi i shkollës "Bekim Sylka" besoj që është një gabim, ndoshta edhe teknik; ndërtimi i shkollës "Bekim Sylka" në vitin 2022 janë 60.000euro ndërsa në vitin 2023 janë 20.000euro dhe me 80.000euro nuk besoj që ndërtohet shkolla, por është fjala për renovim. Fumizimi i shkollave me teknologji informative; parashihi 20.000euro edhe në vitin 2023 / 20.000euro deri në vitin 2025 janë paraparë 100.000euro dhe unë jam për digjitalizimin e shkollave por jo të nënshkruara me kontrata që një tabelë digjitale t'a ketë çmimin 2735euro, me këtë çmim mund të vijnë 7 tabela, me 7 tabela nuk digjitalizohet shkolla. Ne si grup më i madh i opozitës nuk e kemi obligim t'ia bëjmë votat kryetarit për buxhetin. Barra i bie kryetarit Latifi, sepse në zgjedhjet që ndodhën para 1 viti nuk e fitoi shumicën në kuvend, e ka patur një mundësi për koalicion me ndonjë parti që t'i ketë numrat, por siç duket më mirë po i del "hesapit" pa koalicion t'i ketë numrat. 12 drejtorë i emëroi nga partia e AAK-së e këta të tjerët nuk u morën parasysh. Kryetari tha që i kemi patur 34 takime me qytetarët, me drejtorin e financave nëpër lokalitete të ndryshme, duke i dëgjuar hallet e qytetarëve për nevojat e tyre. Sipas këtij buxheti po del që keni dalur në terren, i keni dëgjuar, por ato kërkesat e tyre nuk i keni futur në buxhet për shkak se janë vetëm 10 projekte të reja në buxhet dhe këto nuk janë kërkesat që i kanë patur qytetarët. Në si VV do të jemi kundër këtij buxheti.

Kryesuesi – Faleminderit Leonard. Meqenëse Leonardi foli në emër të grupit të lëvizjes, atëherë kryetari po i përgjigjet menjëherë.

Kryetari – Faleminderit. Buxheti nuk është i kryetarit të komunës, por i qytetarëve dhe për qytetarët e komunës. Në dëgjime dhe konsultime kudo që kam qenë, më kujtohet që kam qenë edhe në Malësi të Vogël dhe Leonardi nuk ka qenë prezent, e që është dashur të jetë. Premtimet janë të kryetarit të komunës, nuk janë të LVV-së, ne i kemi fituar zgjedhjet dhe merre shikoje raportin 6 mujor të institutit GAP dhe e sheh sa premtime i kemi përmbushur. Kjo që dua t'a them nuk do të bën të lumtur, por jemi komuna që kemi përmbush më shumë premtime në 6 mujorin e parë. Vlerësimet i bëjnë qytetarët por ka edhe mekanizma që e masin punën e kryetarit të komunës dhe natyrisht që është edhe puna e kuvendit të komunës, andaj mos e nënçmo veten dhe grupin politik që i takon sepse edhe ju po bëni diçka. Te zjarrfikësit; nuk e di ti a e din që unë bisedova me Xhelal Sfeqlën që AME menaxhon me zjarrfikësit, me rekrutimin e tyre ndërsa komuna e Rahovecit investon te zjarrfikësit, në pajisje, në çizme, në automjete, në objekte, investojmë edhe në drita të veçanta që një prej tyre kushton 3000euro. Për të bërë ty të lumtur, ne do t'a fitojmë një objekt të ri të

zjarrfikësve dhe do t'i zhvendosim zjarrfikësit dhe të vendoset atje te ekoregjioni. Për lehonat nuk dua të flas, shikoje premtimin në GAP, unë i subvencionoj me 300euro, vitin e ardhshëm 400, por vetëm për foshnjat që lindin në QKMF në Rahovec. Artizanalet; ne i mbështesim artizanalet, do t'i mbështesim edhe në të ardhmen edhe në vitin 2023. Më vie keq që po flet në emër të grupit, por kur t'a lexon mirë qarkuren e parë dhe të dytë buxhetoree kupton mirë që subvencionet janë rritur Leonard Morina. Kanë qenë 361.000 për këtë vit dhe janë bërë 800 e sa mijë për vitin e ardhshëm dhe rrjedhimisht rriten edhe subvencionet e zyrës së kryetarit. Këto subvencione nuk i kam përveti e as për familjen time, ndoshta familja jote mund të ketë nevojë në të ardhmen që inshallah nuk ka nevojë. Nuk duhet folur për gjëra që nuk e din qka janë. Te subvencionet në bujqësi; i kemi rritur subvencionet, e kemi eliminuar keqklasifikimin. Pra, nuk mund të shpërndajmë më mekanizëm bujqësorë, nuk kemi kontrata të reja për mekanizëm bujqësorë por do të përfundoj shpërndarja e këtyre kontratave që i kemi, shpërndarje do të ketë edhe në tetor e janar, por kuptohet për aplikimet që kanë qenë 2020/2021 ndërsa aplikime në vazhdim për mekanizma bujqësorë nuk do të ketë. Bujqësia është duke u përkrahur në disa drejtime, ti i përmende 400.000 euro, kjo është gabim, janë mbi 1 milion euro. Ti i përmende vetëm subvencionet që është diçka tjetër, janë rrugët fushore, kanalet e kullimit të tokave bujqësore, investimet në bujqësi. Meganizmat bujqësorë deri vonë, Rasim Fazliu edhe disa të tjerë me provojë e dijnë, janë konsideruar nga ministria e financave si investime kapitale, tani auditori thotë që janë subvencione dhe këto pagesa do të bëhet nga kjo kategori buxhetore. Te shkolla në Fortesë; i askujt nuk është faji që unë jam i zoti, operatorit nuk i kam thënë që patjetër të përfundohet objekti i shkollës "Liria" në Fortesë një vit para. Nuk e di a iu ka shkuar mendja që qeveria e republikës së Kosovës ndërtimin e kësaj shkolle nuk e ka mbështetur me asnjë cent dhe iu tregoj pa marre hiç se cilat projekte i mbështet e cilat jo. Shkolla në Fortesë me mbi rreth 700.000euro plotësisht është financuar nga buxheti komunal, tani ne kemi obligime për pagesë të kontratës sepse operatorit "Euro ing" është treguar shumë serioz duke e përfunduar para kohe. Në këtë kriz globale këto janë lajme të mira, problemin më të madh e kemi me ata që nuk i përfundojnë hiç as para kohe as pas, për shkak të rritjes së çmimit. E përmende zonën ekonomike, nuk e di a jemi mirë unë edhe ti me vesh. Në seancën e paradites thash që e kemi nënshkruar një memorandum mirëkuptimi prej 1.8milion euro, 300.000 euro i bartë komuna, 1.5 milion ministria e tregtisë industrisë dhe ndërmarrësisë, tani jemi duke luftuar me ministren Hajdari për riformatim të memorandumit se çka do të bëhet me para tjera sepse vlera e këtij projekti është 3.159.000euro, kush i paguan këto tjerat? Po mundohemi t'a bëjmë një aneks memorandum që edhe pjesën tjetër ata t'a marrin përsipër sepse realisht sipas ligjit zonat ekonomike dhe parqet industriale i financon qeveria. Thoni që nuk i kemi dëgjuar kërkesat e qytetarëve, Leonard Morina a e dini që për këto kërkesa ekziston procesverbali, po më vjen keq sepse i takon grupit më të madh opozitarë, megjithëse me numër jeni njejtë. Ideja është që me qenë të sakt dhe korrekt. Kërkesat e qytetarëve nga ky vit janë të regjistruara në procesverbal sepse ne kemi hy në një drejtim të pakthyesëm si komunë për shkak të nivelit të transparencës dhe performancës, nuk guxojmë të bëjmë diçka ndryshe sepse është kthim prapa. Janë indikatorë pa të cilët nuk ecim përpara sepse "kur të rreshtohesh i pari, vështirë të ulet garda". Ky buxhet asnjëherë nuk është planifikuar e hartuar më mirë në koordinim me qytetarët dhe organizatat që kujdesen për këtë temë. Në çoftëse po mendoni që duhet me qenë kundër buxhetit, nuk keni nevojë t'ia bëni votat Smajl Latifit. Në fillim e thash që kjo është ngjarja më e rëndësishme e secilës komunë mbrenda një viti dhe duhet të jetë ngjarje solemne. Leonard, mirë që janë 2/3-at projekte të vjetra dhe 1/3 janë projekte të reja ose më pak sepse nuk nuk goxon të kemi projekte të reja ende pa u përfunduar atë të vjetrat, e kemi rekomandim. Çka kemi bërë ne? I kemi mbuluar me projeksione buxhetore kontratat që i kemi të nënshkruara dhe kemi synuar edhe projekte të reja sepse jeta dhe trendi vazhdon. Pra, kërkesat e qytetarëve janë të mbuluara në këto "lotte"- kontrata që janë ekzistuese. E ftoj lëvizjen vetëvendosje t'a votoj buxhetin megjithëse e drejta është e juaja të vendosni se çka dëshironi

të veproni. Ti po thua që e kemi zvogëluar grantin e arsimit, nuk e zvogëlojmë ne grantin e arsimit, është grant specifik. Granti i shëndetësisë është grant specifik ndërsa granti i administratës është grant i përgjithshëm. Afrim Limani e tha shumë mirë; është zvogëluar granti për arsim dhe është zvogëluar numri i punonjësve në shëndetësi. Në qarkoren e dytë buxhetore janë shtuar 25 vende pune për edukatore për qerdhe. Këto janë ndryshimet që kanë ndodhur në mes të qarkures së parë dhe të dytë, nuk i ka bërë komuna e Rahovecit, por ministria e financave e qeverisë së republikës së Kosovës. Të ftoj për reflektim dhe alternativë, prandaj ty edhe grupin tënd e lus për votim. Faleminderit.

Ilir Pallqa – Faleminderit kryesues. Kjo retorika e kryetarit se ne e kemi për detyrë t'a votojmë buxhetin i cili është propozuar dhe krijuar nga ai, është krejtësisht e paqëndrueshme. Keni thënë që e kemi për detyrë që me të marrë në përgjegjësi sepse nuk mund të të kërkojmë përgjegjësi nëse nuk e votojmë. Ne do t'a kishim për detyrë t'a votojmë, nëse do të kishim qenë pjesë e krijimit të këtij buxheti (propozimi). Si ekzekutiv kryetari ka legjitimitet të plotë për përgjegjësitë e tij, miratimi i buxhetit është përgjegjësi e kuvendit. Në kuvend partia e kryetarit nuk i ka numrat, rrjedhimisht vet si AAK nuk mund t'a krijoj propozimin për buxhet. Ne nuk pajtohemi me këtë buxhet, shefi i grupit tonë i tregoi arsyet sepse ne e kemi programin tonë, gjithashtu përgjegjësinë për votën e cila duhet të jetë në përputhje me programin tonë me të cilin kemi kërkuar besimin që e kemi marrë, jo me t'AAK-së. Mes tjerash, siç e ceku edhe shefi, më shumë se gjysma e buxhetit është e destinuar për borxhe të investimeve kapitale dhe si të presim prej dikujt të bëjë diçka të re në komunë, kur ai shumicën e kohës duhet të mendoj se si t'i mbuloj borxhet. Nuk ka as vullnet e as kohë të mendoj të bëjë diçka të re, sepse koha njëjtë si buxheti është në funksion të larjes së borxheve. Pra, jo vetëm që është ndalur ora, por tani ka nis të punoj mbrapsht.

Kryetari - Ilir, ty po të punon ora mirë këtu, kuvendi është duke funksionuar mirë. Programi, vërtetë ka qenë i aleancës sepse me ato programe kemi kandidu. Në momentin kur i kemi fituar zgjedhjet, programit është i pasuruar me plotë ide edhe prej opozitës i futur në buxhet. Mos harro, është e pasaktë edhe ajo që tha Leonardi edhe kjo që po e thua ti kinse po paguajmë borxhe, ne i kemi kontratat me të cilat nuk ka punime. Ka projekte të reja sa të duash, kërkesa të qytetarëve në po ato kontrata. Borxhe paguan qeveria e Kosovës, madje ka krijuar edhe borxh publik, borxh të jashtëm. Asnjë investim kapital deri tani, përveq ministrisë së pushtetit lokal tash së fundi kanë filluar të lëvizin sado pak. Kjo është politik e arsyeshme dhe parimore. Ora nuk kthehet mbrapa kurr, ti je i zgjedhur, por zgjedhjet nuk i ke fituar ndërsa unë asnjëherë nuk kam thënë që i kam numrat në kuvend sepse unë nuk e kalkuloj qeverisjen me numra, qytetarët nuk janë numra. Ta parashtroj një pyetje ty; si anëtar i kuvendit, në cilin debat publik, konsultim dhe dëgjim buxhetor ke marr pjesë?...Ose e ke organizuar ti si grup politik?... Në asnjërin sepse nuk ka ndodhë hiç. Prandaj a e dini që kryesuesit i kanë dështuar dëgjimet buxhetore?...kush ia ka dështuar? Grupi yt politik, Leonard. Prandaj ju nuk keni mundësi të bëni draft buxhet, sepse nuk punoni asgjë. Ekzekutivi ka për detyrë t'i bëjë takimet publike, dëgjimet buxhetore por normalisht i ka edhe kuvendi duke filluar nga kjo që kryesuesit të kuvendit nuk i keni qëndruar "karshi". Nuk e kemi marrë mundit çoftë edhe një njeri t'a ftoni për të bërë një dëgjim publik si i ka hije kuvendit, prandaj unë nuk jam fajtor në çoftëse nuk e kuptoni buxhetin, nuk e ka kuptuar buxhetin në mirëfillje as Leonardi rrjedhimisht as ti. Që 8 muaj është dashur t'a mësoni këtë fakt që; subvencionet, të hyrat vetanake janë rritur, buxheti është rritur për 2.494.000euro. E në këtë rast nëse duhet të flasim për turp, turpi iu takon juve që vetëm një dëgjim buxhetor e keni mbajtur, keni mundur t'i bëni 4 ose 5 dëgjime me kohë me standarde që bëhen 14 ditë para dhe jam i bindur që qytetarët që janë aktiv do t'i kishin paraqitur të njëjtat kërkesa sepse nuk ka diçka më shumë që kërkohet. Nuk dua të polemizoj as me Ilirin as me Leonardin dhe po them që nuk është detyra e juaj të votoni, por buxheti është ngjarja më e rëndësishme për një komunë. Ne kemi arritur t'a bëjmë një kombinim të mirë që kontratat i kemi mbuluar me projeksione buxhetore sipas standardeve dhe kemi hyrë në disa projekte të reja më pak se 1/3-ta.

projekte të reja ka edhe në kontrata të vjetra sepse gjërat ende nuk kanë ndodhur. Për sheshin qëndror flitet që dy vite, por pritet sivjet të lidhet kontrata, që e kemi mbuluar financiarisht. Ka projekt të ri që nuk ka qenë premtim i kryetarit të komunës; sheshi në qendër, por është duke ndodhur sepse e kemi fituar grantin dhe jemi në rregull.

Kryesuesi – Faleminderit kryetar. Rasim Fazliu e ka kërkuar fjalën, para se t'a merr, dy fjalë unë rreth dëgjimeve buxhetore që i organizon KPF. Janë mbajtur dy dëgjime buxhetore, në njërin nuk ka pasur pjesëmarrje të qytetarëve. Ky fakt nuk mundet t'i faturohet grupit të lëvizjes vetëvendosje sepse lëvizja e ka vetëm një përfaqësues, atë e përfaqësoj unë si kryesues i komitetit. Nëse kanë dështuar dëgjimet buxhetore edhe pse një është mbajtur, atëherë i faturohet secilit grup të asambleistave edhe të AAK-së dhe të dy partive tjera opozitare, për shkak që nuk kemi arritur t'i ftojme njerëzit, në fund të fundit njerëzit me zor nuk mund t'i ftojme, interesimi ka qenë i vogël, kjo është arsyeja që mund të quhet një lloj dështimi por jo vetëm i lëvizjes vetëvendosje.

Rasim Fazliu – Faleminderit kryesues. Me vëmendje e kam analizuar buxhetin dhe më vie mirë që për herë të parë nuk kam hasur si çdo vit me probleme rreth keqklasifikimeve dhe gjithmonë kjo pikë e rendit të ditës është shtyrë vetëm për këtë punë, qeverisja komunale mundahej të na bindte që nuk është keqklasifikim, ne i thonim që është dhe kështu ishte puna me tollovi, megjithatë këtë vit më pëlqeu që nuk ka keqklasifikime. Buxhetin komuna e Rahovecit e ka aq sa e ka, nuk mund t'a rrisim as më shumë e as më pak, por, se si është i orientuar buxheti do të flasim me radhë; Më vie mirë që KPF ka kërkuar që kodet të jenë të përgjithshme, më të analizuar, më të detajuar dhe mirë që ka ndodh kjo. Të them të drejtën nuk jam i kënaqur me detajet e ofruara këtu, te disa drejtori thuhet; lista e kërkesave nga ana e qytetarëve që janë mbajtur normalisht nëpër dëgjime buxhetore, çoftë nga qeverisja komunale, çoftë nga KPF që është dashur t'i mbaj të gjitha dhe kjo gjë drejtpërdrejt i faturohet kuvendit komunal, kryesuesit bashkë me anëtarët e KPF-së sepse e them me bindje që në vitet e kaluara KPF e ka luajtur një rol shumë të rëndësishëm, ka raportuar para kuvendit me listë të projekteve duke i hartuar shumë mirë, asgjë nuk ka patur abstrakte, cdo gjë ka qenë konkrete, këtë herë më vie keq që ka ndodh kështu, por pajtohna me kryesuesin që i faturohet të gjitha grupeve politike. Unë besoj që nuk janë kërkuar listat e kërkesave, sepse lista e kërkesave është shumë e madhe nga qytetarët. Unë kam pritur që ju drejtorë të nderuar do të futni në listë vetëm ato kërkesa që mund të realizohen me buxhetin e vitit 2023, duhet të jetë e saktësuar sepse siç e dini buxheti ndahet çdo vit. Kur të dal nga kjo mbledhje, nëse më pyet ndonjë qytetar se çfarë do bëni për Celinën, Çifllakun ose për Operushën duhet të jem në dijeni që t'i them që do të bëhet kjo, kjo, ky projekt etj... etj, mirëpo nuk ka listë konkrete sepse unë duhet t'a di që me buxhetin 2022 çka po realizohet në Celinë?... Nëse më pyet dikush, nuk mund t'i tregoj asgjë sepse është komplet lista, nuk e di çka do të realizohet saktë. Buxheti për vitin 2023 gjithashtu nuk ka listë konkrete që të thuhet se në vitin 2023 do të bëhet kjo...kjo...ky projekt. Jo me qenë një listë e gjatë e më pas nuk e dijmë cili projekt kalon tutje, e cili jo. Në këtë drejtim me këtë listë jam i pakënaqur. Do të dal konkretisht në disa projekte, deshta të pyes për informacion drejtorin e bujqësisë; e kemi kanalin e kullimit të tokave bujqësore Celinë – Fortesë në vlerë prej 239.520euro dhe i gjatë qenka 8760 metra, pyetja është; kah do t'a ketë shtrirjen ky kanal? Shtratin? Më intereson shumë ku nis dhe ku përfundon sepse unë jam prej atij vendbanimi dhe e di mundësitë aty. Tjetër, unë e kam një kërkesë kryesore të vogël që nuk është e paraparë këtu në buxhet. Celina përveç shkollës që e kemi të ndërtuar nga KARITAS-i gjerman pas luftës, që e falënderojmë shumë, tjetër objekt nuk kemi të rëndësishëm të ndërtuar prej komunës dhe quditërisht 20 vite kaluan dhe asgjë nuk kemi as ambulanca as shtëpi të kulturës. Një shtëpi të kulturës e kemi që e kemi ndërtuar në vitet e 90-ta me vet kontribut me fshatarët, mirëpo fatkeqësisht ajo shtëpi sot e asaj dite ka mbetur pa meremetim brenda. Është jetike për banorët e fshatit Celinë sidomos për shkollën, nxënësit dhe arsimtarët por edhe partitë politike sa herë dëshirojnë t'i mbajnë mbledhjet, qytetarët e Celinës etj... Prandaj,

propozoj të futet në buxhet projekt dhe të kryhet në vitin 2023 sepse mendoj që aty nuk ka nevoj për investime shumë të mëdha dhe e luan një rol shumë të madh, nuk kemi nevoj të hyjmë nëpër shkollë ose objekte tjera, shtëpi private etj... Kërkesa ime dhe propozimi im është meremetimi i sallës afër shkollës të hyn në këtë buxhet për vitin 2023. Kryetari i ka fituar zgjedhje, a bën koalicionë a jo, është problemi i tij dhe unë nuk e lodhi kokën për punën e kryetarit se çka bën ai. Çdo kuvend komunal sipas meje në nivel të Kosovës është i obliguar t'a miratoj buxhetin, por në çoftëse unë jam kundër propozimit që e ka dhënë qeverisja komunale, unë duhet të dal me propozime konkrete duke thënë në këtë kod e dua këtë ndryshim, kryesuesi e vendos në propozim dhe në çoftëse miratohet nga shumica atëherë ecim tutje. Prandaj, nuk është e mjaftueshme me thënë e votoj buxhetin, se votoj buxhetin. Duhet të japim propozime konkrete, vetëm atëherë e luajmë rolin e një anëtarit të kuvendit. Unë si individ meqenëse nuk kam ndonjë propozim tjetër, por atij që e dhash më herët dhe që kam qejf kryesuesi t'a vendos si propozim para kuvendit, nuk kam ndonjë vërejtje tjetër dhe unë si Rasim Fazliu do t'a votoj buxhetin. Faleminderit që më dëgjuat.

Kryetari – Faleminderit Rasim Fazliu. E lus Beratin të flet rreth kanalit të kullimit të tokave bujqësore Fortesë – Celinë dhe t'a tregoj trajektoren kah i bie. Është punuar diçka, por kemi kontratë edhe sivjet edhe vitin e ardhshëm. Mund të them që projekte kontrate për secilin vendbanim në këtë rast edhe për Celinën, mund të them që shumë shpejtë synojmë t'i përmbyllim varrezat e martirëve, synojmë t'a përmbyllim projektin që e ka "Mendi SH.P.K." me përroin, rrugët fushore, ndihmë për fermerët në bujqësi, projekte në kubëzim etj... Unë jam dakord, në çoftëse është dakord edhe Afrim Limani, ajo shtëpi në Celinë është e gatshme edhe duhet me qenë funksionale për aktivitete kulturore, publike, sportive. Afrim Limani të na tregoj a mundemi tani t'a fusim në buxhet, apo me bartje të mjeteve?. Unë e jap zotimin publik, jo para Rasimit, por para qytetarëve të Celinës dhe të komunës që është i nevojshëm renovimi në plotni i atij objekti që është i gatshëm. Andaj në emër të ekzekutivit të komunës shprehi gatishmërinë, shpresoj që të gjithë grupet politike do t'a mirëkuptojnë sepse është një kërkesë shumë reale. E lus drejtorin e financave nëse ka mundësi të na jep ndonjë detaj për këtë kërkesë specifike të Rasim Fazliut.

Afrim Limani – Mësues, për shkak të buxhetit të limituar që e ka drejtoria për kultur, sepse ky projekt hyn në kuadër të drejtorisë së kulturës. Kisha propozuar dhe zotohem para juve që këtë projekt t'a përfundojmë me bartjen e mjeteve në fillim të shkurtit dhe hapësirën me kohë e kemi të mjaftueshme si t'a vendosim në listën e projekteve kapitale si kështu afati kohor është i mjaftueshëm për realizim.

Rasim Fazliu – E falënderoj kryetarin edhe drejtorin për mirëkuptim, për mua është e rëndësishme që në vitin 2023 të realizohet. Kaq.

Burim Krasniqi – Faleminderit kryesues. Kryetar, unë po nisem pak më ndryshe, nuk është faji i kryesuesit e as i KPF-së. Kryesuesi i kuvendit komunal në Rahovec e ka krijuar një grup të KPF-së në "Whatsaap" të cilit grup i ka kërkuar të takohen për dëgjime buxhetore dhe për buxhetin. Përfaqësuesja e Aleancës në KPF dhe shefja e grupit të asambleistave të AAK-së ka thënë që nuk ka arsye për takim, përndryshe e kemi diskutimin në bisedë, mundemi t'a prezantojmë kur të doni. Nuk ka qenë mungesë destruktiviteti jonë, por ndoshta për shkak të fitores së fundit dhe për shkak të votave e ka bërë një mbivlerësim që të mos të përfillet kërkesa e kryesuesit për takim paraprak. Nëse nuk është kështu duhet të ma demantoni cilido prej KPF-së. E dyta, para se të diskutoj rreth buxhetit, po nisna të obligimet buxhetore; 8.887.000euro sipas raportit të drejtorisë së financave janë borxhe dhe obligime kontraktuale, kur them borxhe them në kuptimin e plotë sepse rreth 595.000 janë borxhe sepse janë kontrata të lidhura të vitit 2019 të cilave iu ka skaduar afati i ligjshmërisë së kontratës. Kur flitet për rastin, p.sh shkollë fillore e mesme e ulët "Liria" Fortesë, ndoshta operatori ka qenë i fortë dhe ka punuar para kohe, por drejtori duhet të thotë kuartë që janë afate ligjore që duhet përmbajtur. Nuk jemi këtu në pazar, i fortë e i butë por ai e përfundon dhe duhet t'i përmbahet afateve ligjore në përmbushjen e obligimeve të veta. Te pjesa tjetër, sot kam prituri që materiali në seancë të na vie

pak më i harmonizuar, serioz, i kompletuar, të ketë një logo të komunës në fillim, të ketë një përshkrim fillestar, qëllimin, synimet, çka pritët prej buxhetit, çka të realizohet, pastaj lista e investimeve kapitale dhe në fund listën e projekteve të detajuara dhe një përmbledhje të caktuara dhe një nënshkrim çoftë i kryetarit të komunës çoftë drejtorit të drejtorisë së financave. Ka ardhur një fletë - një vendim, buxheti n'Exel dhe lista e investimeve. Dokumenti është i shturur, nuk është serioz të paraqitet para asamblesë komunale. Sa i përket buxhetit brenda, të çështjeve të subvencioneve zyra e kryetarit i ka nevojat e veta, e di që ka shumë kërkesa të qytetarëve, nevoja për mjekim që kryetari ka të drejtë të ndajë ndihmë, është mirë që e ka. Janë 160.000 / 2023-2025, por 401.680euro në 2024 nuk kam mundur t'a kuptojë kurr! Çka ka në vitin 2024 që zyra e kryetarit e ka 401.680euro subvencione. U tha vazhdimisht edhe prej kryetarit që kultura rinia dhe sporti e kanë hapësirën e vet, kanë me qenë të përkrahura dhe nuk harrohen. DKRS për subvencione i ka vetëm 110.000euro. E kam bërë një pyetje më herët se çka do të ndodh me shtëpitë e kulturës që nuk iu ka qelë dera për 4 vite dhe sivjet nuk iu qel dera asnjëherë. Asnjë aktivitet në asnjë shtëpi të kulturës në komunën e Rahovecit nuk ka patur, përveç aktiviteteve dhe ngjarjeve që i kemi pasur për promovime të caktuara dhe ndonjë debat, këshill të fshatit, por jo ngjarje kulturore. Te aspekti i përmbledhjes së obligimeve, kur e shohim në total buxhetin dhe projeksionet buxhetore për 3 vitet e ardhshme është fakt përmbledhet, por kur e prejmë në vite, dalim jashtë afateve ligjore d.m.th nuk e përmbysim në 2023 obligimet e kontratave që përfundojnë në 2023, përsëri barten borgje në 2024. Te subvencionet në bujqësi; për 2023 i kemi 440.000euro mirë është kjo rritje e subvencioneve dhe iu ka mundur ikjen prej kualifikimeve të kodeve buxhetore, por sipas shënimeve që na ke dhënë drejtor, për mekanizma bujqësorë kapin vlerën 674.797euro, vetëm në vitin 2021 janë 243.539euro duke patur parasysh numrin e mekanizmave bujqësorë që janë përndarë, kjo nënkupton që në 2023 do t'i paguani këto mekanizma bujqësorë përsëri dhe nuk do të ketë mundësi të çasemi ndryshe në subvencione të bujqëve, çoftë në fazën fillestare, ndihmë në plehëra apo farë, apo çoftë në produkte finale në çoftëse mendohet të subvencionohet ndryshe d.m.th ky borgj apo obligim kontraktual që e ka drejtoria e bujqësisë në raport me mekanizma bujqësorë me këtë shumë prej 440.000 nuk mund të mbulohet, në 2023 nuk mund të jep subvencione në inpute bujqësore, plus nëse kemi parasysh edhe 137.657euro që janë obligime për ndërtim të serrave me bashkëfinancim. Te investimet kapitale e kam bërë pyetjen edhe në KPF po është marrur me të qeshura. Ky lifti ose ashensori i komunës i ka vetëm 5000euro, përfundimi ose totali është 15.000euro, këto 10.000 tjera kah vijnë nuk e di!... Te shërbimet publike; Ndriçimi publik në komunën e Rahovecit, kontrata e vitit 2019 e ka vlerën 222.846.85euro borgje të mbetura, buxheti i 2022 është 90.000 d.m.th përsëri mbetet në 2023, nuk po mbërrin kontratën e 2022 të mbyllet në afat ligjor, po e bart në borgj 2023. Ndërtimi i rrugëve; obligimi është 399.944.95euro e lidhur në 2020 të përfundojë në 2023, buxheti 2022-2023 i parasheh 550.000, mbetje janë 150.000, ndërsa lista e rrugëve që është paraqitur përfshin 23km rrugë plus me grantin e performancës bëhen rreth 40km rrugë. Në çoftëse bëhet 40km rrugë me 150.000euro, tregoni ku se unë personalisht do t'a shtroj por nuk bëhet kjo, nuk e keni të specifikuar se cila rrugë bëhet 2023 e cila 2024. Meremetimi i rrugëve dhe trotuareve të shërbimet publike; obligimi që është i mbetur prej 2021 e kap vlerën 463.490euro duhet përfunduar deri në 2024, ndërsa buxheti 2023-2024 është 380.000 që nënkupton mbi 80.000 prap të mbesin borgje e të barten, nuk mbyllet financiarisht si duhet. Te bujqësia; Kanali Shtavica – Fortesë thotë që do të përfundojë në 2025, a nënkupton kjo që edhe në 2023-2024 Fortesa do t'i ketë këto probleme me vërshime?! Kanali për kullimin e ujërave Rahovec- Fortesë-Dejnë-Çifllak-Sopniq, kontrata 2021 me borgj 3.354.190euro afati i kontratës deri 2024, buxhetimi është 1.1670.000euro pra nuk e mbulon kontrata edhe 1.707.000 të mbesin obligime dhe dalin përtej kontratës. Zona ekonomike në Opterushë; parashihen investime të vazhdueshme deri në 2025. A nënkupton që kjo nuk arrin të përfundojë dhe të jetë funksionale deri në 2025?... I kemi dy kode buxhetore që janë kontradiktë mes veti, ndërtimi i infrastrukturës për tregun

rrushit "Hardh fest" faza e dytë dhe ndërtimi i objektit të depos bujqësore. Ku do të bëhet kjo depo bujqësore, a është i njëjti lokacion? Kur është prezentuar te bartja e mjeteve është thënë që depot bujqësore do të bëhen te ish tregu i rrushit, do të investohet depoja apo ambienti për Hardh festin? Janë dy projekte të ndryshme që kanë të bëjnë me të njëjtin vend. Sa i përket çështjes së stadiumit, në 2022 nuk e di që bageri e ka bërë ndonjë lëvizje nalt, ende asgjë konkrete. Në çoftëse fillon sheshi pa e definuar stadiumit, do të vështirësohet kualiteti i lojës të KF Rahovecit nëse detyrohet të luajnë jashtë Rahovecit, bie shikueshmëria, nuk e ka entuziazmin e vet. Te lista e projekteve; Te drejtoria e kulturës nuk e pashë askund objektin e shoqërisë kulturo-artistike "Bajram Curri" që është paraparë si zhvështore, nuk figuron askund. Buxheti 2023 ka vetëm 20.000euro për zgjerimin e ujit të pijes, a nënkupton kjo që Senoci edhe në 2023 nuk do të ketë ujë të pijes sepse janë dhënë mbi 30.000euro janë bërë disa shpuarje por pa rezultat, e kurse me 20.000 nuk bën hiç kjo punë. Mungon një planifikim serioz i trajtimit të ujërave të zeza në komunën e Rahovecit. Besoj që në 2023 duhet t'a kemi projektin detal dhe të kompletuar të trajtimit të ujërave të zeza në komunën e Rahovecit. Në përjashtim neve që kemi fat që ujërat e zeza derdhen në lum, shkoni në Pataqan, Senoc, Drenoc të gjitha lokalitetet që nuk kanë lum afër, janë në gjendje epidemike sidomos gjatë stinës së verës. Si përfundim, mungesa totale e planifikimit buxhetor, borgji i trashëguar, kontratat e papërfunduara, obligimet kontraktuale të paplanifikuara mire sepse e ceka më lartë në 4 vite mbulohen, për ndër vite jo. Borgjet që janë krijuara me kontratat të lidhura në vitin 2020 nuk mbulohen komplet në 2023. Ato që janë lidhur në 2021 nuk janë planifikuar mjaftueshëm të mbulohen në 2024, nuk është planifikuar pakoja jubilarë, nuk ka asgjë rreth kontratës kolektive, nuk ka fond emergjent sepse kemi padi në gjykata që nesër mund t'i humbasim. Nuk ka një vizion të kuartë të zhvillimit të komunës në aspektin ekonomik, nuk ka askund diçka rreth agroturizmit që e kemi promovuar prej të gjithë neve në fushatë zgjedhore, asnjë rresht ose asnjë veprim konkret. Nuk ka përkrahje të kulturës dhe sportit për faktin që subvencionet janë aty ku janë, mund të ketë edhe dëmtim të stadiumit, për faktin që është dëshmuar që për 5 vite nuk ka aktivitete kulturore nëpër shtëpitë e kulturës që i kemi. Nuk përkrahje në prodhim për fermer për faktin që subvencionet në bujqësi nuk mund t'i mbulojnë borgjet ose obligimet kontraktuale që i keni të lidhura sot. Thjeshtë ky buxhet vazhdon me të njëjtin avaz që e bën komunën tonë jointereseante për vizitorë me përjashtim të "Hardh festit" që është ngjarje që është trashëguar dhe e ka marrë hovin e vetvetiu, përveç që nuk kemi vizitorë edhe 80% të mjeteve tona që i fitojmë ne në komunë të Rahovecit dhe 80% të mjeteve të mërgimtarëve që vijnë, i shpenzojmë jashtë komunës së Rahovecit. Mendoj dhe besoj që buxheti duhet t'a ketë një orientim që sa më shumë të hyra tonat t'i shpenzojmë këtu dhe sa më shumë të të hyrave të mërgimtarëve të shpenzohen këtu, si dhe sa më shumë vizitorë të ketë për të rritur të hyrat e komunës, ta bëjmë këtë vend të jetueshëm mjaftueshëm. Kryetar, pa dashur të bëjmë politikë me buxhetin, është mirë të bashkëbisedohet edhe me të tjerët, e thash në fillim ka mungesë bashkëbisedimi në mes grupit të Aleancës dhe grupeve tjera në draftimin e buxhetit, duhet t'i ndëgjojmë bashkëpunorët profesionist brenda dhe jashtë komunës. Si përfundim me bindje të plotë e them mbi bazën e analizave që i kemi bërë si LDK në mbjedhjen e saj mbrëmë, del që buxheti përpos që nuk ka projekte të reja, nuk arrin të stabilizohet financiarisht, përsëri bart borxhe dhe nuk mbyllen kontratat në afate ligjore. LDK e thotë atë që është në harmoni me veprimet e saja, nuk është LDK që thotë që; ne nuk pajtohemi me formën se si është bërë buxheti, me vërejtjet që i dhamë e në anën tjetër për hirë të qytetarëve e votojmë buxhetin, kjo është lojë politike. Kur them që diçka nuk është mirë, ne mendojmë që nuk është në të mirë të qytetarëve e jo në të mirë tonën. LDK nuk pajtohet me këtë format të buxhetit me vërejtjet që i dhamë më lartë, mbi të gjitha mospërbushja e të gjetura të ZKA-së ku thotë që ka vonesa në zbatim të kontratave dhe si e tillë grupi i asambleistave të LDK-së këtë format të buxhetit nuk e përkrah.

Kryetari – Unë nuk jam befasuar me Leonardin se e kuptoj, jam befasuar për të keq me Burimin, i cili flet gjëra që nuk kanë lidhje as me ligjin as me realitetin. Kontrata kolektive nuk mund të buxhetohet për vitin 2023. Më vie pak “marre” ajo që duhet t’a them, por duhet të konsultohesh pak me rrethanat pak me ligjin, çka është kontrata kolektive dhe si paguhen mësimdhënësit sipas kontratës kolektive. Është kodi kategoria paga dhe mëditje, prej këtij kodi marrin, ndërsa më vie keq që nuk ke ndryshuar asgjë prej debateve zgjedhore, as atëherë nuk ke folur saktë, as sot nuk je duke folur saktë. Aktivitetet kulturore në shtëpitë e kulturës, më vie përsëri marre që duhet me të thënë, e hiç nuk je i lumtur ajo që do t’a them, përveq në Xërxe që nuk ka aktivitete kulturore në shtëpinë e kulturës. Në Krushe të madhe, Rahovec, në Ratkoc te kjo e reja në të gjitha ka aktivitete kulturore me një mori promovimesh, pavarësisht që dikush priton të merr pjesë sepse mendon dhe frigohet që fiton ndonjë gjë kryetari i komunës përkundrazi, jeta kulturore në komunën e Rahovecit është jashtëzakonisht e pasur, kemi lloj-lloj aktivitete kulturore dhe përkujtimore që mbahen në shtëpinë e kulturës por edhe në këtë sallë të kuvendit. Në Drenoc nuk ka shumë aktivitete kulturore sepse nuk ka shoqëri kulturo-artistike, ndërsa më vie keq që ne e ndihmojmë shoqërinë kulturo-artistike të Xërxes dhe nuk ka aktivitete kulturore në shtëpinë e kulturës të ndërtuar në Xërxe. Përndryshe shtëpia kulturore në Xërxe është e përshtatshme për aktivitete kulturore dhe e inkurajoj shefin e LDK-së që edhe ky të merret sado pak me aktivitete le t’a gjallëron pak Xërren. Ujërsat e zeza; Ne kemi problem me impiantë të ujërave të zeza, nuk kemi problem me kanalizim të ujërave të zeza, kemi problem me derdhje të ujërave të zeza sepse nuk ka impiantë të ujërave të zeza dhe impinanti i ujërave të zeza kushton kushton 30 milion Burim Krasniqi dhe nuk është mirë në kuvend me fol “kodër mas bregu” sepse e din shumë mirë që nuk është ashtu siç the dhe nëse LDK-ja paska paska mbajtur mbledhje duke i bërë këto analiza, po më vjen keq shumë për LDK-në. I kemi 20.000euro për ujë të pijshëm; ne kemi memorandum të mirëkuptimit me K.R.U Gjakovën. Po e potencoj që provokacionet e tua që a do të ketë ujë Senoci, projekti është mbi 500.000euro, kurdo që i nis procedurat K.R.U Gjakova, unë i dal zot me 49% të mjeteve, a e dini se K.R.U Gjakova nuk ka marrë asnjë financë prej së zhvillimit ekonomik siç ka marrë çdo vit dhe sivjet nga vetfinancimi dhe inkasimi i mjeteve mezi i ka bërë paratë për projektin Vranjakë – Bratotin se as atje nuk ka ujë të pijshëm. Është shpallur procedura dhe është lidhur kontrata 31.000euro. Kur do që të jetë gati K.R.U Gjakova çoftë për projektin Senoc – Drenoc çoftë për projektin në lagje të epërme, Hoqë e Madhe, Zoqisht, Optrushë, këtu është komuna e Rahovecit dhe mos u lodh hiç për këtë punë a i kemi 20.000 apo sa i kemi. Asnjë borgj nuk ia kemi K.R.U Gjakovës në realizimin e investimeve kapitale. Ke folur për “Hardh festin” dhe një kontratë në fazën përfundimtare të tregun të madh të rrushit, ke folur edhe për një kontratë që është e ndryshme, për ndërtimin e depos ose qendrës së magazinimit të prodhimeve bujqësore, po, depoja bujqësore do të bëhet pikërisht aty ku kanë qenë kafiteritë, është kontratë tjetër nga ajo që e kemi për trajtimin e tregut të rrushit. Janë dy kontrata të ndryshme të cilat ndodhin në një pronë. Është me fat që depoja është në fazën e vlerësimit në depon bujqësore, është fat që komuna jonë e ka zënë vendim e parë për performancë për vitin e kaluar dhe një pjesë të granteve është dedikuar për qendrën e magazinimit të prodhimeve bujqësore. Te zona ekonomike; A do të thotë që në vitin 2025 do të funksionalizohet zona ekonomike, mezi e kemi themeluar si zonë ekonomike në 2020 në janar është licencuar dhe qe dy vite duke luftuar për investime dhe tani është lajm i mirë që ata e kanë procedurën për të filluar investimin në funksionalizimin e zonës ekonomike dhe ju thash 1.5 miliona janë prej ministrisë, 300.000euro komuna, por prapë nuk mbulohet e gjithë vlera sepse vlera e parashikuar e projektit është 3.159.000euro minimumi dhe me çfarë çmimi lidhet kontrata, këtë nuk e di. Te kanalet e kullimit; Këtu herë thuhet nuk po investoni në kanale të kullimit, herë thuhet pse po investoni në bujqësi. Të ishte shteti jonë i zhvilluar, komuna nuk është dashut të merret me kanalet e kullimit të tokave bujqësore, por ja që ne duhet të merremi me këto t’a ruajmë jetën e qytetarëve, pronën dhe tokat bujqësore. Burim Krasniqi, ti e din shumë mirë, je zyrtar me përvojë në

institucione publike, e din shumë mirë që thirret një farë vazhdimi i sigurimit të ekzekutivit të kontratës, pra kur kontrata skadon, e thirr operatorin nëse dëshiron t'a vazhdoj edhe për një vit përmes zyrës së prokurimit. Ne kemi menduar, a kemi llogari t'i shkëpusim këto kontrata që janë më të vjetra apo të tentojmë të krijojmë marrëdhënie të re duke vazhduar sigurimin e ekzekutimit të kontratës ekzistuese. Auditori na ka dhënë vetëm rekomandim që pse nuk e kemi vazhduar sigurimin e ekzekutimit të tenderit për qerdhen e fëmijëve në Ratkoc dhe për rregullimin e shtratit të lumit që ndanë Krushën me Celinë, pra auditori nuk ka thënë pse është vonuar kontrata, problemi është që ne nuk e kemi vazhduar dhe nuk e kemi ditur që duhet ta vazhdojmë dhe kemi marrë rekomandim që të gjitha kontratat që skadojnë ju vazhdohet siguri ose informatizohen dhe gjejmë forma për të lidhur kontrata të reja. Trotuaret; Ka trotuare që janë bërë sivjet, por mos harro se ti e din, në çoftëse janë kontrata të vjetra dhe nuk kanë filluar ende të zbatohen dhe ti e din që ligjin thotë; 70% kemi të drejtë ta zbatojmë d.m.th ne i japim përparësi vetes me operatorët e lodhur që nuk ka ecur puna mirë. Por ne nuk e kemi këtë problem, problem e kemi sfidën e rritjes së çmimeve dhe mbulueshmëria e 20%, nëse miratohet në kuvend dhe ky 20% ka gjasë t'i riaktivizoj operatorët dhe t'i rikthej në punishte. Nuk është më e njëjta këngë si në vitin 2021 dhe e din shumë mirë që çmimet janë tjera dhe ka vështirësi. Te afatet ligjore Burim, ti ose nuk e din, por unë jam i bindur që e din, bile kur po thua kemi mbajtur si parti mbledhje, analiza dhe debate, mendoj që edhe mos t'a dije ti, tjerët që kanë qenë po. E din që afatet ligjore tejkalohen me vazhdimin e sigurimit të ekzekutimit të kontratës sepse rritja e çmimeve te ne i ka bllokuar edhe operatorët më të fuqishëm, janë lodhur dhe dërrmuar dhe vonesa e kontratave është si pasoj e kësaj gjendje. Zyra e kryetarit të komunës për subvencione për sivjet buxhetin e ka patur 129.000euro. Kultura sporti dhe Rinia 100.000euro dhe unë shumë subvencione nga zyra ime i kam ndihmuar sportit kulturës dhe rinisë dhe bursa për studentë. Te subvencionet se si do ti përkrahim imputet bujqësore; iu tregova këtu ose unë nuk di ta them saktë, ose nuk kuptohem drejtë. Thash që mekanizmi bujqësorë është pjesë e pagesës së kontratës, ka përfitues të shumtë, nuk guxojmë t'i anulojmë këto kontrata përkundër vonesës sepse janë të nënshkruara dhe patjetër që duhet t'i ekzekutojmë. Këto kontrata nuk janë për 1 vit, vazhdojnë edhe në vitin 2024 dhe neve na krijohet hapësira që subvencionet që i kemi të hyjnë në impute bujqësore dhe krijohet një sistem tjetër të subvencionimit të bujqësisë. Nuk e di si flitet më thjesht e më saktë, nuk është retorikë por është logjik reale origjinale e zhvillimit. Nuk do të ketë kontrata të reja për mekanizëm bujqësorë, do t'a mbajmë pozicionin e serrave dhe do t'i shohim mundësitë me impute bujqësore, rrugë fushore, kanale të kullimit, përkrahje të qendrave të grumbullimit, përkrahje të qendrave të përpunimit të perimeve, përkrahje të bujqëve të rinj etj... etj... Ky është buxheti i komunës së Rahovecit dhe nuk mund të hyjmë në obligime tjera pa i përfunduar këto të vjetrat, nuk mund të hyjmë në projekte tjera përtej mundësive buxhetore që përcaktohet me ligj, prej qeverisë si donacion çka të vie mirësevjen dhe besoj që do të vijnë edhe projekte të tjera të cilat nuk diskutohet në seancë të kuvendi të komunës. Po të ftoj edhe ty edhe LDK-në për reflektim, e keni kërkuar listën e projekteve kapitale gjithashtu listën e obligimeve, ja ku e ke, kërkuesi ke qenë ti. Kur i ke kërkuar të gjitha këto, LDK-së është dashur t'i thoni votojeni dhe meqenëse ti kemi dhënë të gjitha, ne ta japim mundësinë ta votoni buxhetin me gjithë grupin politik. Faleminderit shumë.

Burim Krasniqi – Kryetar, nuk po ta përmendi emrin për të kërkuar replikë, por meqenëse je i pari i komunës e kam obligim të të drejtohem. Nuk është ajo se si po e thoni ju, ne të gjithë e kemi keq, veç ti e ke mirë. Nuk ekziston mundësia të gjitha partitë tjera keq, të gjithë keq, Burimi mos me ditë, Leonardi gjithashtu, LDK me pasë gabim, kalkulimi gabim, e ti me pasë mirë, ka diçka që nuk është mirë te ti, aty. Është dashur të bashkëbisedojmë me kohë, e jo ta injorosh ftesën e kryesuesit për bashkëbisedim të përbashkët të të gjithë asambleistave për t'a parë buxhetin, diskutimet buxhetore dhe draftimin e buxhetit, kur nuk përfillet dhe nuk merret parasysh është pak "arrogance e votës" në raport me partitë opozitare. Uroj

që i keni votat dhe e kalon buxhetin i cili është i qytetarëve, jo i joti, është fakt i shërben qytetarëve. Megjithatë ne si LDK nuk jemi sot, por është një traditë, ka njerëz që kanë qenë kryeshef ekzekutiv, nënkryetar komune, drejtor, kryesues, që janë të vetëdijshëm plotësisht për qëndrimin politik që e kanë marrur mbrëmë në raport me draft buxhetin që është bërë. Në LDK të gjithë anëtarët informohen në plotni me zhvillimet në asamble komunale me materiale, sepse jemi të hapur plotësisht brenda shtëpisë tonë. Qëndrimi është i përbashkët dhe jo individual dhe nuk është ai autoriteti i Burimit në LDK që e determinon formën e sjelljes së LDK-së ose votimin në asamble komunale. Kërkoj mirëkuptim dhe mos të dalim që çdo herë ne e kemi keq, ka pak më shumë se ajo.

Kryetari – Burim, më vie keq por asnjëherë nuk e thash që jam më i dituri. Të them të drejtën bukur disa gjëra i di, por më i dituri nuk jam. Unë jam i zgjedhur nga qytetarët, kryetar i komunës dhe në çoftëse i takon dikujt të flet në emër të qytetarëve dhe subjekteve politike, po flas unë, realisht i bie që jam mbi subjekte politike sepse jam kryetari i komunës, e ti e morre përsipër me fol edhe në emër të subjekteve politike. Unë thash për juve që pikërisht që i dini gjërat, po më del diçka tjetër te ju, edhe i dini edhe në fund nuk p'e votojmë buxhetin, kështu i bie kjo punë, sepse ti i din shumë mirë këto që po t'i them, bile unë të thash, në çoftëse ti nuk i din, ata që i ke pasur në takim kanë një përvojë dhe të kanë thënë; kërkoje listën e obligimeve në kuvend, parashtroje pyetjen; pse në 2024 zyrës së kryetarit iu kanë shtuar subvencionet, nëse dëshiron t'i them edhe tjerat se çka keni diskutuar aty, ne jemi të hapur dhe më duhet të bëjë partneritet me LDK-në për shkak të transparencës. Vlerësoje ti a e voton apo jo, por mos harro që unë nuk jam arrogant, e kam dëgjuar një komunikatë publike unë mbrëmë, e sot do të isha në dri duke shikuar se kush po zë peshk, por nuk jam arrogant sepse kam dashur të debatoj këtu, votat janë, i besoj komunikatave publike. Nuk jam unë prej atyre që i iki përgjegjësi, jam shkaktarë që po vonohet, përndryshe e ftoj kryesuesit t'a vendos në votim buxhetin dhe jemi në rregull.

Kryesuesi – Faleminderit kryetar. Vazhdojmë me 5 minuta pauzë, rikthehem prapë në seancë.

Kryesuesi – Përshëndetje edhe një herë për të gjithë, jemi në pikën e gjashtë të rendit të ditës, diskutimi është i hapur rreth buxhetit për vitin 2023.

Sinan Kryeziu – Faleminderit kryesues, përshëndetje për të gjithë të pranishmit këtu në sallë. Fillimisht dua të them që ne grupi i vetëvendosjes, i shterrëm mundësitë dhe debatet në zyrën që e kemi në Rahovec, me mendimet tona, pas mendimeve dolëm në konkluzione dhe pas konkluzioneve dolëm me qëndrime konkrete. Qëndrimin tonë e prezantoi këtu shefi jonë i respektuar Leonard Morina. Mendoj që këtu te borgjet publike komunale, vlera totale është 8.797.511 euro, ajo që rastis të shoh te ky borgj publik prej kontratave që janë të ndërlidhura me komunën dhe nënkontraktorëve është gjithsej 15.735.665 euro, këtu po i bie që janë borgj më shumë se gjysma e shifrës totale por ajo që më rastisi t'a shoh është që të gjitha borgjet që janë këtu; p.sh. shkolla e Bellacërkës u fol shpesh, ndërtimi i rrugëve është bërë në vija të trasha pa specifikim se ku do të bëhet konkretisht. Në rubrikën e fundit më bën përshtypje dhe thotë; kontratat janë në proces. Kryetari disa herë e përsëriti ku tha që operatorët për shkak të ndritjes së çmimeve kanë stagnuar në përfundimit e punëve që i kanë të kontraktuara. Unë nuk dua të shes mend këtu por, kur lidhet një kontratë ta mendojmë hipotetikisht nëse një firmë, operator që po e quan kryetari ka marrë një kontratë prej komunës së Rahovecit, supozojmë 100.000 euro dhe brenda një muaji çmimet bijnë dhe ai i ka fitimet diku rreth nëse parashihet 30% ai fiton 60%, shtrohet pyetje; a i thotë ai komunës që kam fituar shumë dhe dua të t'i kthej paratë. Nuk ka kështu, as logjik, as ligj as asgjë. Kur jemi te kontratat; kontrata bëhet me pëlqimin e dy palëve, në këtë rast kontraktorit dhe nënkontraktorit, sa ka të drejtë ai nënkontraktori që e merr punën ka edhe detyrime dhe që i bie me ligj vendor dhe ndërkombëtar në momentin që nuk kryhet puna në kohë të caktuar se si është bërë me paragrafe të kontratës me kushte të përgjithshme dhe të veçanta ai hyn në penallti nga punëdhënësi në këtë rast, poashtu siç po e përsërit kryetari shpesh p.sh firma euroingi mund të na dërgoj

le përmbaruesi, a e kuptoni?.. sa kemi të drejtë si komunë, kemi edhe detyrime ndaj tij, kur e përfundon punën në kohë të caktuar dhe pagesa të bëhet në kohë të caktuar. Shefi jonë i grupit Leonardi që propozoi kundër buxhetit, gjatë diskutimit brenda në parti Leonardi ngriti si shtetësim duke thënë që zona industriale - ekonomike në Optrushë ka filluar në 2013 dhe ky e përdori atë logjikën që prej 2013 – 2022 tha që dyshoj që bëhet diçka e mirë këtu pavarësisht atij përlqimi nga ministria. Mendoj që është mirë të na respektoni mendimin tonë, neve na ndëshkon qytetari nëse e kemi gabim. Këtu jemi të japim kontribut aq sa dimë e aq sa mundemi, nëse e kemi gabim jemi në prani të mediave dhe qytetarët na ndëshkojnë. Do të ishte mirë që kryetari së paku të na kishte ftuar për një kontribut në hartimin e këtij buxheti. Fatkeqësisht nuk jemi përfill nga askush. Më ka munduar fakti që shpesh kryetari këtu në asamble na ka paragjykuar që kemi bërë martesë – konorizim me partitë opozitare. Kryetari mund t'a tërheqë këtë sepse fakti i sotit po del që ka qenë gabim dhe sot po vërtetohet që konorizim nuk me patur me asnjë parti opozitare pavarësisht që kemi qenë të koordinuar për të mirë të qytetarit. Sot po e kuptoj që partia opozitare me ekzekutivin kanë bërë një fejesë që nga ana juridike fejesa i bie premtim për martesë dhe besoj që në të ardhmen do të kurorëzohen.

Sejfullah Sejfullahu – Faleminderit për urimin Sinan. Ashtu si thua ti, hipotetikisht ke të drejtë se ashtu ka qenë. Burimit, Leonardit, kryetarit po edhe partisë time kam replikë shumë. E para; kryetari i tha Burimit që çdo send që e keni kërkuar iu kam realizuar, i bie që LDK-së ia ke plotësuar çdo kërkesë dhe nuk po të votojnë. Çka do që kam kërkuar unë këtu, nuk është bërë asgjë dhe unë kam vendosur të abstenoj ose kundërshtoj, por mund të më mbushet mendja si Rasimit që nëse kërkoj diçka për qytetarët e Krushës së Madhe edhe unë mund të hyjë në këtë fejesë. Kësaj radhe nuk po flas si pjesë e grupit parlamentar, por si Sefë dhe si qytetar i Krushës. Partia ime ka dalur me një qëndrim. Kryetar, kur ke bërë punë të mira, publikisht të kam falënderuar dhe jam për të atyre që edhe kam postuar dhe nuk ke guxuar të ma bësh llajk. Çdo punë e mirë, çdo iniciativë prej atyre investimeve e deri te çmimi “Ukshin Hoti” poashtu Beratin e ke drejtorin më të mirë dhe krenohem që ai është në ekzekutivin tënd. Partia demokratike dje ka dalur me një qëndrim që e përkrah buxhetin, më vie mirë që PDK e ka lexuar dhe vlerësuar buxhetin, por jam i sigurtë që asnjëri nuk e ka hap dhe sidoqë të jetë jam autokritik prej të gjithëve dhe nuk i marr hua askujt. Me përgjegjësinë më të madhe pa tendencë opozitare Krusha meriton më shumë sepse në raport me të gjitha investimet unë jam i pakënaqur, mendoj që nuk është bërë mjaftë. Dëgjimet publike i kam përcjellur, nuk e kam parë dikënd prej opozitës që ka bërë një propozim dhe është kyqur në buxhet. Më kujtohet Merisa një propozim për ngjyrosje. Kur jemi te Krusha, në përgjithësi ka nevoj shumë më tepër duke qenë i vetëdijshëm për kufizimet buxhetore, por mendoj që është në një vend numri i banorëve është 5 fish më i vogël, ekziston një fushë sportive, ndërsa në Krushe të Madhe jo. Po flasim për stadium e për sallë të sporteve por përsëri po luajmë me top nëpër “hithra”. Sot kam pritur që të zgjidhet çështje e asaj përrockës, sot e arsyetove në atë formë, por edhe ajo nuk është arsye. Duhet t'a gjeni një formë për operatorët sepse as 20% e 30% në këto rrethana nuk do të jetë e mjaftueshme, çdo send është duke u dyfishuar dhe duhet t'a gjejmë një bazë ligjore t'i kryejmë punët. Sot kam pritë një propozim dhe iniciativë për Krushë të Madhe, një banesë të banimit kolektiv për familjet e martirëve dhe dëshmorëve. Mos të harrojmë i kemi 206 të vrarë dhe të zhdukur si dhe 20 dëshmorë, i ke informatat dhe ia din gjendjen çdo familjes. I kemi qinda hektarë të komunës në Krushe për një iniciativ të tillë. Për shtëpinë e kulturës foli edhe Burimi nuk dua t'a zgjas iu kemi lodhur edhe për të në 2-3 seanca kam pyetur, por përderisa jeni ekzekutiv faji mbetet i juaji, gjejeni formën dhe përfundojeni atë punë. Në fund, po ju them edhe votuesve që nuk kemi as kurorë, as fejesë, as martesë e as ambicie me askënd hiç. Vota ime abstenim do të jetë për arsye të fymjeve që po më vijnë prej portaleve që nuk janë aspak të mira. Çdo kush e ka dinjitetin dhe votën e vet dhe po më vie keq që jam i detyruar të marr një vendim të tillë prej këtyre fyerjeve, po flas kushtimisht. Faleminderit për vëmendjen.

Kryetari – Përshëndetje. Sefë, në Krushë të Madhe është një përrua që ka probleme, është vonuar kontrata, jemi marrur vesh që “Co-ing” të vazhdoj sigurimin e ekzekutimit të kontratës dhe punën sepse më llogari kemi kështu sesa të lidhin kontratë të re e më pas nuk dihet çka bëhet. Varrezat e martirëve – dëshmorëve; është fat i mirë që është shpallur tenderi dhe përkrahet nga agjencioni për menaxhimin e komplekseve përkujtimore që do të riparohet të gjitha varrezat të dëshmorëve dhe martirëve. Dy muze; muzeu te kompleksi do të bëhet dhe muzeu i “Ukshin Hotit” është në fazë të dytë. Kolektorin e ujërave të zeza nuk mund ta gjeni në buxhet sepse paradite iu thash që përmes gratit të performancës që e ka fituar komuna jonë do të investohet në kolektorë të ujërave të zeza në Krushe dhe në disa rrugë që të qojnë kah drini. Kemi nga mjete, por mjetet nuk i kemi të gjitha ende, DEMOS-i i ka lëshuar vetëm 592.000euro. Parku në qendër do të kompletohet dhe do të bëhet i mirë. Rrugët në Krushe janë duke vazhduar, i kemi kontratë po flasim për rrugë lokale me kubëza. Qerdhja e fëmijëve; pëlqimi energjetik është marrur, do të bëhet kycja, është bërë stacioni i pompave dhe qerdhja do të jetë funksionale nga viti i ardhshëm dhe do të rekrutohen edukatorët për qerden në Krushe, Ratkoc, Xërxe dhe në qytet. Ne synojmë sa më shpejtë të themelojmë ansamblin e këngëve dhe valleve të komunës së Rahovecit me bazë në Krushë të Madhe sepse është me traditë. Palestra sportive dhe stadiumi nuk është projekt që financohet nga komuna, do të bëjmë diçka si komunë, por nuk është projekt i yni por i ministrisë së kulturës. Vitin e ardhshëm do ta bëjmë një fushë sportive në shkollën e mesme në Krushë të Madhe. Kemi edhe projekte të tjera që lidhen me Krushën e Madhe, nuk po përpiqem të të sfidoj në kuptimin pozitiv dhe mendoj që nuk ka arsye mos ta votosh dhe nuk ka nevoj të ta dëshmoj që unë jam shumë i lidhur me atë zonë. Ne kemi shumë punë edhe në qytet por, kemi problem me vonesë të operatorëve për shkak të rritjes së çmimeve si dhe krizës globale. Operatorët janë në pritje të 20% që shteti synon t'i subvencionoj. Të ftoj ta votosh buxheti, abstenimi është votë edhe kundërshtimi është votë, mendoj që Krusha e Madhe ka trajtim të vëmendshëm në shumë projekte nga ana e komunës së Rahovecit. Uroj që ky interesim rreth fshatit të parë pas qytetit të vazhdoj më tutje në agjendën e investimeve serioze. Qendra e banimit social; Një operator që e ka fituar atë projekt e ka bërë një nënkontraktor, nënkontraktori ka patur probleme me kontraktorin. Ne e kemi bërë prerjen e punimeve dhe e kemi shpallur tenderin për fazën e mbetur. Aty janë 16 banesa, ky projekt është financuar tërësisht nga komuna, ne mund ta shohim mundësinë edhe të ndërtimit të objektit të banimit social për familjet e martirëve në ndonjë pronë publike në Krushë me partneritet publiko - privat sepse është shumë i kushtueshëm. Edhe një herë ju ftoj ta votoni, pavarësisht debateve të ndryshme sepse në fund ëshira jonë është sa më shpejtë të shkëputemi nga kontratat e vjetra duke filluar me kontrata të reja.

Bejtullah Deliu – Faleminderit kryesues. Deshta ta kursej kohën për këtë debat, sepse pak a shumë është potencuar një deklaratë publike e dalur nga dega këtu. Po të mos ishte kjo deklaratë do të ishte debati pak më i nxehtë dhe më konstruktiv me atë martesë të opozitës edhe pse është banalizuar pak kjo punë e martesës – fejesës, sidoçoftë unë nuk mund të dal jashtë vendimit që partia e merr, por kjo nuk d.m.th që të kaloj pa kritikë kryetar. Nëse ju kujtohet në muajin shkurt – mars kur është dashur t'i kalojmë disa pika të rendit të ditës për bartjen e mjeteve, iu kam lutur po në këtë foltore që të kemi respekt edhe si opozitë, të ftohemi në pika të rëndësishme që i përkasin komunës tonë sepse edhe votat e opozitës janë të dikujt, janë të qytetarëve të komunës tonë të cilët duhet të respektohen me anë të mendimit dhe veprimit tonë. Mangësia këtu është që ne si opozitë duhet të bëhemi vetkritik, po kritikojmë për buxhet por alternativë nuk po shoh nga asnjë parti opozitare përfshirë edhe PDK-në edhe mua personalisht. Nëse është në favor të qytetarëve që ky buxhet mos të kaloj, unë dal edhe kundër partisë dhe të gjithëve por alternativë nuk po shoh. Pasiqë jemi duke e akuzuar njëri tjetrin, opozitë – opozitë, çoftë opozitë me kryetarin apo pushtetin nuk po e shoh si debat të shëndetshëm në favor të qytetarëve. Nuk kërkuam asgjë që shkon në favor të qytetarëve, përveç kërkesës së mësuesit të nderuarit baca Rasim që e kërkoi, e cila është marrur parasysht që të futet në muajin

shkurt për realizim. Pajtohem me disa kritika që edhe të kritikosh edhe të votosh nuk bën, kritika gjithmonë është e mirë, por proceset që janë në favor të qytetarëve duhet të mos i ndalojmë duke pësuar përsëri qytetet. Krizën po e përmendim vazhdimisht, unë vet merrem me biznes dhe e di çka d.m.th të marrës një punë me një çmim të ulët ndërkohë të rritet poaq, edhe unë jam duke pritur një lëvizje të atillë nga qeveria e Kosovës dhe shpresoj që merren këto hapa. Nëse ka alternativë tjetër, kisha pas dëshirë t'ju ndëgjoj dhe ta diskutojmë atë propozim krahas këtij, nëse jo, unë personalisht obligohem të dal jashtë karakterit tim dhe të rreshtohem nga vendimi i partisë me keqardhje. Vendimi dihet, është për publik. Duke uruar që mos të keqpërdoren këto lukse nga qeverisja, kryetari, drejtorët kur të del diçka në publik e tani të relaksohen, uroj që herëve tjera të jemi më kompakt të gjithë. Pra ata që i përkasin subjektit të PDK-së duhet të marrin qëndrimin e partisë, i pëlqyer individualisht apo jo, ndoshta edhe mua nuk më pëlqen ky vendim por i përkas këtij subjekti, kësaj ngjyre dhe konstruktivitetit që PDK-ja me vite e ka treguar, këtë po e dëshmon edhe sot.

Merisa Sharku – Përsëritje për të gjithë. Po kyçna pak si vazhdimësi të parafolësit Bejtullahut. Në çdo stancë po më bie me përsëritë, këtë seancë po më bie t'a përsëris dhe të rikthehem te synimi im kryesor, që nga kyçja, tendenca për të kontribuar në komunën e Rahovecit e që është përkrahja e grave dhe vajzave të komunës sonë. Duke e shikuar buxhetin askund nuk vërejta as edhe një përkrahje minimale për këtë kategori të shoqërisë që është gjysma përbërëse e numrit total të popullsisë së Rahovecit. E kam përsëritur disa herë edhe pse çdokush e din këtë fakt, në Rahovec si askund e asnjë vend tjetër gratë punëtore merren me artizanale, ku është komuna në këtë pikë?... Kur mendon t'a filloj përkrahjen për këtë kategori të shoqërisë që jep kontribut jo të vogël në zhvillimin ekonomik të vendit. Në seanca më parë, kërkesa ime për subvencionim të grave që merren me artizanale u drejtua drejt ekzekutivit, në mënyrë retorike erdh përgjigja që ne japim subvencione për gra, për gra që merren me bujqësi. Ne e dijmë shumë mirë numrin e grave që merren me bujqësi në Rahovec. Nëse me të vërtetë dëshirojmë t'i ndihmojmë gratë me subvencione, atëherë duhet të hapim linja të subvencione enkas për artizanale, fushë me të cilën merren ato. Kjo kërkesë ka qenë edhe para disa seancave nga ana ime. Është përmendur që te buxheti në përgjithësi, te pjesa e subvencioneve ka rritje enorme, shumë mire. Ne si grup po e parashtrojmë një kërkesë reale dhe shumë të nevojshme përderisa gjysma e popullsisë së Rahovecit janë gra që merren me artizanale dhe gjysma e popullsisë janë burra që merren me bujqësi, duhet t'i ndajmë edhe subvencionet pak si përgjysmë. Prej 440.000euro subvencione për bujqësi, pse mos të shkojnë gjysma për artizanale?... Është absurde me thënë që munden edhe gratë të aplikojnë për subvencione në bujqësi kur ato nuk aplikojnë për subvencione në bujqësi sepse nuk i duhet një traktor por një makinë për qepje. Kjo mund të jetë mënyrë ekskluzive për të mirën e ekonomisë së Rahovecit. Ndoshta me të vërtetë nuk e kemi kuptuar në mënyrë të drejtë ndarjen buxhetore siç po aludohet prej ekzekutivit, por duhet ta kuptoni që ne këtu jemi vetëm për të mirën e qytetarëve, nuk jemi për ta kundërshtuar askënd që bënë punë të mira dhe të drejta, si në rastin që u përmend më herët kinse dëshirojmë vetëm ta kundërshtojmë buxhetin, aprovojeni ndonjë kërkesë tonën. Kryetari dhe Bejtullahu e përmendën që nuk keni kërkesa konkrete, kjo le të jetë një kërkesë konkrete që subvencionet të ndahen në mënyrë të barabartë. Po e marr me mend përgjigjen e kryetarit duke thënë që “nuk ka kërkesa” herën e kaluar kjo ishte përgjigja e tij. Duhet të ndërmerren pak më konkretisht gjërat, kur ka filluar subvencionimi për bujqësi, ka qenë një fillim, është bërë regjistrimi i bujqëve. A janë të regjistruara sa gra punojnë artizanale? ...Jo, nuk regjistrohen, unë kam shumë familjare që punojnë, konkretisht kjo i bie që grate në Rahovec punojnë në të zezën. Ato duhet të stimulohen duke i regjistruar bizneset dhe të vazhdoj ekonomia e Rahovecit të fuqizohet. Pres përkrahje nga të gjithë, veçanërisht prej gjinisë femrore që është në kuvend se pjesa e ekzekutivit është e “shëmtuar” të shikohet prej vendit ku jam ulur që kanë mbetur vetëm dy gra, kurse burrat dominojnë si në ushtri.

Besmire Bytyqi – Faleminderit kryesues. Duke ju përshëndetur të gjithëve, posaqërisht “babën” e opozitës siç po e quajmë portalet, Burim përshëndetje të veçantë për ty. Po pajtohem me shumicën e fjalëve që i tha Bejtullahu, këtu sot nuk kemi parë konstruktivitet. Kemi pa prej atyre që thonë nuk e votoj sepse nuk e përkrahim Smajl Lafitin, dalin disa “portale” që duhet me qenë të paanshme, por realisht janë shumë të anshme edhe i kritikojnë, kjo është arsyeja pse nuk po votohet ky buxhet, përndryshe përveç Merisës nuk kemi parë diçka konstruktive, ide creative. Uroj edhe shpresoj që muajve në vazhdim ose deri në vitin e ardhshëm kemi me u mbushë pak mend, përndryshe të nderuar anëtarë të KPF-së dhe gjithë këshilltarëve komunal nga këtu ju bëj thirrje për pjesëmarrje nëpër debate dhe dëgjime publike, 90% nuk marrim pjesë, e dini shumë mire, më pas është shumë normale që nuk i dijmë kërkesat e qytetarëve nëpër vendbanimet ku ne jetojmë sepse unë nuk i shoh asambleistat aty. Unë në vendbanimet e mia shkoj, në vendbanimin tim dhe në fshatrat përreth dhe ne nuk e dijmë a e kanë kërkuar një rrugë fushore, subvencione apo diçka tjetër. Si Aleancë e përkrahim këtë buxhet, jo pse jemi parti në pushtet, por sepse ne ia duam të mirën qytetarit. Faleminderit.

Leonard Morina – Faleminderit kryesues. Po ndërlidhem pak te këto kërkesat konkrete, prej partive tjera tha që nuk pat ofertë dhe në momentin që nuk ka ofertë tjetër atëherë nuk duhet të votojmë kundër. Mendoj që ofertën është dashur t’a kërkoj kryetari dhe ekzekutivi të këshillohet në çoftëse dëshiron diçka nga ne. Në momentin që kryetari nuk na ka thirrur për bashkëpunim për këtë buxhet, ne nuk kemi se si ia ofrojmë alternativën. Më bëri pak përshtytje deklarata e Bejtullah Deliut, i cili tha; partia ka vendosur që të kaloj, por ndoshta unë kam pasur mendim tjetër. Unë mendoj që partinë e përbëjmë ne, vetëvendosje është Leonardi, Sinani, Merisa, Vlora, Iliri dhe ata njerëz që na rrethojnë. Vendimet e parties janë atë që i bijnë këta njerëz, brenda partisë, unë nuk e di si e vendos një parti që nuk është këshilluar anëtarë i kuvendi komunal. Si do që të jetë kjo është pjesë tjetër. Ne nuk kemi kërkesë individuale për një rrugë në lagje time ose në fshat timin. Merisa e tha një kërkesë në nivel komunal, nuk kemi ardhur ne këtu të bëjmë kërkesa dikush për Malësi, dikush për Gexhe e tjetri për Ratkoc.

Bejtullah Deliu – Nuk e di sa ka dëgjuar me vëmendje kolegu Leonard, faleminderit për vërejtje por unë deshta të jem sa më i sigurtë rreth temës. Kjo që unë bisedoja u zgjua dikush nga gjumi dhe lindën projekte tjera, d.m.th derisa unë fola përveç Rasimit nuk pati askush ndonjë kërkesë, demantom nëse ka diçka kundër. Nëse them unë që them partia, e kemi diskutuar dhe është marrë një qëndrim. Partia është parti, unë jam parti. Kritikat ia dhashë direkt kryetarit, që prapë po e përsëris që duhet të bashkëpunoj sepse edhe votat e opozitës janë të qytetarëve të komunës sonë. Hiç më pak se 60% opozitë jemi këtu dhe nuk e di çka ka të keqe këtu, që ju jeni parti – individë që vendosni, të gjitha këto rregulla secili i dijmë dhe besa e marrim përgjegjësinë secili për veti apo si subject në votim apo mosvotim të elektoratit, t’i shohim qytetarët a po na dënojnë apo na shpërblejmë me këto veprime që po i bëjmë. Nëse dëshirojm të debatojmë pa fund mund të vazhdojmë, por këtë debat të ndërsjelltë kisha dashtë t’a ndërprejmë, të kalohet apo mos të kalohet kjo pikë, të vendoset në votim. **Lirigzon Kastrati** – Përshëndetje edhe një herë për të gjithë. Përtej interesit politik dhe përtej interesit të lokalitetit nga vijmë, është interesi qytetar. Nuk ka këtu as “babë” të opozitës ose diçka të tillë, duhet t’a përfaqëzojmë vullnetin e qytetarëve që e kemi marrur ne dhe për të cilët jemi të thirrur në këtë kuvend. Ky buxhet mbi 80% nuk i përfshin kërkesat dhe nevojat e qytetarëve dhe si i tillë ka vetëm vazhdim të projekteve. Ne këtu debatuam dhe diskutuam. Duhet të instalohet një sistem qeverisës që projektet që nisen të përfundohen brenda afatit ligjor dhe çdo vit të kemi mundësi për projekte të reja të cilat kontribuojnë në zhvillimin ekonomik të komunës së Rahovecit.

Rasim Fazliu – Faleminderit kryesues. Unë jam i obliguar të reagoj. Kërkoj mirëkuptim nga anëtarët e partive tjera politike, cdo kush le t’i mbajnë qëndrimet e veta të partive politike dhe absolutisht nuk lejoj të përzihen në qëndrimet e partisë time PDK. Partia jonë ka dalur me komunikatë dhe ne e respektojmë

komunikatën tonë, nuk ka nevojë të më "jep mend" as Leonardi, as ai tjetri, e as ky, se kur kemi qenë ne parti ka kanë qenë organizatë. Ne jemi parti para tyre, kemi përvojë i kemi të gjitha, kemi qenë bartës të të gjitha proceseve, nuk ka nevojë që ata të na gjykojnë se pse po votojmë, ky është problemi jonë i drejtpërdrejt. Subjekti jonë, dega ka marrë qëndrim dhe nuk iu intereson juve tjerëve se çka bëjmë ne. Kështuqë nuk do të ishte mirë që t'a ngacmonin çdo herë njeri tjetrin.

Burim Krasniqi – Faleminderit kryesues. Kështu, në rrethanat që u krijuan së fundmi besoj që për shkak të disa proceseve që jemi, ndonjëherë kryetarin e komunës e mirëkuptoj për tensionet që mund t'i ketë sepse i ka proceset që duhet t'i shtyj tutje, siç është sot buxheti, dje bartja e mjeteve ose disa veprime të ndryshme të ngjajshme që janë kritike në momentin e votimit dhe provon t'a imponoj mendimin e vet që është pjesë e demokracisë. Qëndrimet politike janë politike dhe kërkoj prej secilit kolegë të kursehen në raport me qëndrimet politike të partive tjera. Kryesuesi besoj që nuk duhet të lejoj të ketë kualifikime prej asnjë asambleisti në raport me asnjë asambleist sepse është e papranueshme. Dikush është "baba", dikush "nana", dikush merr qëndrim pro, dikush kundër. Këto janë çështje individuale të secilit ose secilit grup, nuk ka nevojë të lejohen kualifikimet jashtë gjuhës parlamentare në kuadër të asamblesë komunale. Disa herë na ka ndodhur në këtë mandat, përkundër sjelljes të ashpër të kryetarit të komunës kam qenë i qetë sepse ka pas çështje që ka provuar t'i imponoi shtyerjen tutje të proceseve, pjesa tjetër është e paarsyeshme. E dyta; potencova duke u bazuar në vërejtjet e ZKA-së, duke u bazuar në situatën që është, në dokumentacionin e kërkuar, nuk ka hapësirë për kreativitet sepse janë obligime kontraktuale, çfarë kreativiteti?... Një shtëpi e kulturës u kërkuar për lyerje në Celinë, the duhet t'a bëjmë me bartje të mjeteve sepse nuk kemi hapësirë buxhetore. Planifikimi aktual nuk arrin t'i mbuloj në kohë kontratat, por do të detyrohen të vazhdojnë sigurimet e kontratave sipas formatit që e kanë praktikuar që të arrihet deri në 2025 të mbulohen komplet këto obligime. Qëndrimet politike i kemi secili tonat.

Kryesuesi – Faleminderit Burim. Besoj që mjafton ky cikël i diskutimeve, një fjalë e kam unë para se t'a vendosim në votim. Atëherë përshëndetje për të gjithë. I nderuar kryetar, nëkryetar, të nderuar anëtarë të kuvendit komunal, drejtorë të drejtorive dhe qytetarë të dashur të komunës së Rahovecit. Fillimisht dua t'a shpreh mirënjohjen time ndaj asamblesë komunale apo ndaj anëtarëve të kuvendit komunal që po vazhdoj të jem kryesues edhe në përfundimin e këtij cikli buxhetor. Sot, me miratimin e buxhetit nga ana e kuvendit komunal përmbillet një cikël buxhetor i cili është i domosdoshëm për funksionimin e institucioneve komunale ku qytetarët janë përfitues më të mëdhenj të këtyre cikleve apo këtyre punëve që kryhen nëpër këto institucione. Sa i përket buxhetit për vitin 2023 sikur edhe në vitet e kaluara është një shpërndarje pothuajse e njëjtë dhe nëse e shikojmë prej një ane është një shpërndarje korrekte në bazë të asaj se si kryetari i komunës apo Aleanca në Rahovec i ka fituar zgjedhjet dhe po udhëheq me mandatin e tretë. Pra, për këtë vit kemi një buxhet prej 17.548.000 kemi një ngritje prej buxhetit komunal në krahasim me vitin e kaluar prej 2.5 milion euro kjo duke iu falënderuar qeverisë së republikës së Kosovës dhe planit të saj qeverisës tani e tutje. Pa dashur t'a gjykoj votën e ndonjërit të anëtarëve të kuvendit, jam gjithashtu kundër gjykimit të njeri tjetrit mes veti rreth përcaktimit të tyre për buxhetin, askush nuk mund t'a shoh në formën e tjetrit shpërndarjen e buxhetit apo buxhetimin në nivel komunal. Në fund të fundit është një propozim prej kryetarit të komunës dhe përgjegjësia e votës është individuale. Sa i përket buxhetit nuk përkon me idenë time qeverisëse dhe për një zhvillim të komunës duke patur parasysh edhe në mungesë të një alternative tjetër, duke e parë që është vetëm një alternativë unë nuk kam votë "për" këtë buxhet. Shembull konkret që mund t'a marr; është një vizion më ndryshe se si e shoh unë buxhetimin apo miratimin e buxhetit. Nëse e marrim shembull këtu, tabelat digjitale që po investohen në komnatat e Rahovecit janë njëkohësisht me disa probleme në disa vendbanime ku mungon uji i pijes. Një diskrepancë e madhe meqenëse edhe politikat e Aleancës këtu janë duke funksionuar dhe janë duke u pëlyer prej qytetarëve, por në këndvështrimin tim nuk

është e aryeshme. Nëpër disa vendbanime kemi investime në drunj dekorativ, ndërsa disa pjesë të lagjeve sidomos në qytet ku nuk kanë kyçjen në rrejtin e ujërave të zeza apo në kanalizim. Poashtu edhe nëpër pjesë të lagjeve ku tensioni i energjisë elektrike në mungesë të pronave komunale që shfrytëzohen për vendosjen e trafave, energjia është e ulët ndërsa në anën tjetër kemi shërbime kulturore në vlerë prej 750.000euro, kur dikush nuk ka një tension të mjaftueshëm të energjisë elektrike. Ju falënderoj për kontributin e dhënë gjatë kësaj kohe rreth buxhetit komunal për vitin 2023, po e vendosim në votim dhe po vazhdojmë tutje... Kush është “për” miratimin e buxhetit për vitin 2023?... Abstenim?... Kundër?... Atëherë me 18 vota “për”, 1 abstenim dhe 12 vota kundër miratohet buxheti komunal në vlerë prej 17.548.000 për vitin 2023.

7. Shqyrtimi dhe miratimi i vendimit për programin komunal tre vjeçar për banim 2022 – 2024;

Nënkryetari – Faleminderit kryesues. I nderuar kryetar, kryesues, përshëndetje për të gjithë.

Në mungesë të Lendriti, e kemi programin komunal 3 vjeçar, këtu me neve është edhe konsulentja e cila e ka ndihmuar këtë program bashkë me grupin punues. Pa dashtë t’a zgjasë më tepër, këtu i keni qëllimet, synimet dhe objektivat secili e keni planin para vetës. Nëse keni diçka rreth aspektit profesional, këtu e kemi zonjën Drita Shabani që mund të përgjigjet në të gjitha pyetjet. Paraprakisht i kërkoj falje për pritje dhe vonesë.

Kryesuesi – Faleminderit nënkryetar. A ka dikush diçka lidhur me këtë plan?...Nëse jo, atëherë po e vendosim në votim, kush është për miratimin e këtij plani?... Me shumicë unanime aprovohet edhe kjo pikë e rendit të ditës... Pauzë prej 5 minutave dhe vazhdojmë me dy pika e mbetura...

Kryesuesi – Para se të fillojmë me pikën e tetë të rendit të ditës, kryetari e ka një njoftim të shkurtër.

Kryetari – Atëherë meqenëse është lajm i mirë, ju ftoj te restorant “Panorama” në Optrushë të gjithë asambleistët për një darkë, e meritoni dhe e meritojmë. Faleminderit.

8.Shqyrtimi dhe miratimi i vendimit për shpalljen me interes të përgjithshëm P- 71510033-01041-1 në zonën kadastrale Xërxë;

Afrim Oruqi – Faleminderit kryesues. Të nderuar anëtarë të kuvendit, para jush keni vendimin për shpalljen me interes të përgjithshëm për parcelën nr. 1041-1 në zonën kadastrale në Xërxë. Bëhet fjalë për parcelën në emër të pronarit Hysni Vehbi Thaqi në sipërfaqe prej 14 ari e 72m katror. Qëllimi i shpalljes së interesit të përgjithshëm është hapja e rrugës publike, saktësisht kjo parcelë gjendet në kufi me parcela komunale që gjendjen afër depova të matrex-it, sipas PZHKZ-s 2013 kjo parcelë është zonë ndërtimore. Ftoj anëtarët e kuvendit që t’a votojnë këtë vendim.

Sinan Kryeziu – Faleminderit kryesues. Sa e kuptova unë janë 1400m katror (14 ari), e gjitha do të bëhet rrugë, apo një pjesë e kësaj?...

Afrim Oruqi – Mendoj që projektori na ndihmon sado pak, një ortofoto ka qenë e prezentuar në projektor, kush e njeh atë zonë – terren. Bëhet fjalë për 14 ari e 72 metra komplet, aktualisht kjo parcelë në terren është e kalueshme, është rrugë dhe shfrytëzohet prej atyre përfituesve që janë me qera aty afër, çoftë prej kalimtarëve të rastit. Ne vetëm dëshirojmë ta zyrtarizojmë, në të ardhmen jemi dakorduar me pronarin aktual që ta këmbejmë parcelën sepse i njëjti e ka fituar me aktgjykim të plotëfuqishëm të shkallës së dytë të apelit. Ka tentuar disa herë ta bllokojë këtë rrugë dhe një pjesë të objektit, në mirëbesim kemi kërkuar që deri sa të marrim vendimin prej kuvendit të komunës që mos të pengoj punën në atë zonë.

Kryesuesi – Faleminderit drejtor, dikush tjetër lidhur me këtë pikë?... Nëse jo, atëherë po e vendosim në votim, kush është për?... Me shumicë unanime aprovohet edhe pika e tetë e rendit të ditës.

9.Shqyrtimi dhe miratimi i vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës;

Erhan Morina – Faleminderit kryesues, i nderuar kryetar, nënkryetar, drejtorë të drejtorive, anëtarë të kuvendit, media dhe ju të pranishëm. Para jush keni propozimin për formimin e komisionit për zbatimin e

procedurave dhe ofertave për vlerësimin e dhënies në shfrytëzim afatshkurtër deri në 5 vite të lokaleve të palestrës. Këto lokale kanë qenë edhe më herët në ankand, mirëpo në mungesë të interesimit për marrje në shfrytëzim, ne si drejtori për ekonomi zhvillim dhe turizëm planifikojmë që edhe një herë t'i shpallim përmes ankandit këto lokale. Ftoj anëtarët e kuvendit t'a votojnë këtë komision i cili përbëhet prej 2 anëtarëve të ekzekutivit, 2 të kuvendit dhe një nga përfaqësuesi joqeveritarë.

Kryesuesi – Faleminderit drejtor. Ky komision përbëhet prej 5 anëtarëve; 2 janë prej ekzekutivit, 2 nga kuvendi dhe 1 nga sektori joqeveritarë. Kryetari po i propozon menjëherë dy anëtarë prej ekzekutivit.

Kryetari – Faleminderit. Nora Boshnjaku – drejtoreshë për punë inspektuese. Erhan Morina – drejtor i drejtorisë për ekonomi zhvillim dhe turizëm.

Kryesuesi – Faleminderit kryetar. Tani duhet të delegohet 2 anëtarë prej kuvendit – grupeve të asambleistave; ju ftojme ta propozoni nga një anëtarë, do të shkojmë me votë në çoftëse nuk keni ndonjë mirëkuptim në mes të grupeve.

Besmire Bytyqi – Grupi i Aleancës propozon Feriz Thaqin.

Leonard Morina – Lëvizja Vetëvendosje propozon Sinan Kryeziun.

Burim Krasniqi – LDK nuk ka propozim.

Sejfullah Sejfullahu – PDK me të abstenuarin Sejfullah Sejfullahu propozon Melinda Iska Oruqi.

Kryesuesi – Atëherë kemi 3 propozime për 2 përfaqësues nga kuvendi i komunës, vazhdojmë me vota, cili anëtarë ka më shumë vota për, dy prej treve emërohet anëtarë të këtij komisioni.

Për Friz Thaqin, kush është për?... 17 vota për

Për Sinan Kryeziun, kush është për?...

Për Melinda Oruqi Iska, kush është për?... 22 vota për

Kryesuesi – Faleminderit. Kemi edhe një ndryshim prej ekzekutivit

Kryetari – Nora Boshnjaku është në komisionin për ankesa dhe ka konflikt interesi, mbetet ta propozoj Ofrim Oruqin. Erhan Morina mbetet në komision.

Kryesuesi – Atëherë katër anëtarë në këtë komision u emëruan, një nga sektori joqeveritarë që duhet të vendoset pas thirrjes publike që e bën komuna. Po e vendosim në votim këtë komision me këtë përbërje, kush është për?... Me shumicë unanime aprovet edhe pika e fundit e rendit të ditës. Faleminderit edhe një herë për debatin dhe konstruktivitetin që e kemi zhvilluar. Ditë të këndshme

01 Nr.379/22

Datë:28.10.2022

Procesdhjetësi:

Albion Krasniqi

